

**स्वतन्त्रता
री
जोत**



स्वतन्त्रता री जोत (काव्य)

(डॉ.) ब्रजनारायण पुरोहित

राजस्थान एज्युकेशनल स्टोर
बीकानेर

स्वतन्त्रता रिजोट : ब्रजनारायण पुरोहित
 पैली संस्करण : वासन्ती नवरात्र स्थापना, वि. सं. २०४४
 भोल : ४० रु. (चाळीस रुपीया)
 आवरण : पं. आसाराम गोस्वामी, बीकानेर
 मुद्रक : जवाहर प्रेस, बीकानेर
 [राजस्थानी भाषा-साहित्य एवं संस्कृति अकादमी, बीकानेर रु.
 (एक हजार रुपीया) आर्थिक सहयोग भूँ प्रकाशित]

SWATANTRATA RI JOT by Dr. Brij Narayan Purohit

Price : Rs. Forty only

समर्पण

माँ सरस्वती देवी
रै
श्री चरणां में सादर

सिद्धमारायण पुरोहित

पस्तानो

मानव-मन री विचार-वीक्षियां साहित्य-सरजण हेत भावभोम बण'र विविध आयामी निर्माण-प्रक्रिया नं सक्रिय करै । सामाजिक, सांस्कृतिक अर ए तिहासिक परिप्रेक्षमें रचित कृतियां सूं ही इतिहास री सामग्री परिपुष्ट हुवै ।

जलमभोम नै मुरग सूं भी महती, रुढ़ी-रूपाळी मानणवाळां जू'भारां स्वतन्त्रता री जोत नै ऊजळ अर ग्रसड राखण खातर आत्मोत्सर्ग करण नै तप-त्याग अर वळिदान, साहम अर वीरत्व नै आपरै जीवन में सदीव अंगीकर कीनो है । आजादी री भावना सूं वीरोज्यो वीर-भाव चिरकाळ सूं अजस्य रह्यो है । जद-जद देस माथे हमलावरां रो कुदीठ पडी, 'मायङ्-भू रै लाडलां डट'र सामनो कीनो अर हँसतां-हँसतां प्राणां री बाजो लगावंता हुँकार अर संखनाद कीनो । बां रो अक ही धेय हो- 'आजाद हुवै जननी म्हांरी ।' भारत माता परतन्त्रता री सांकळां में जकड़ीजगी अर परवसता सूं करा'वती हो उण वखत सूं ही आजादी रै दीवानां वळिपथ रा राही बण'र आपणो करतव निभायो । वै इण रास्ट्र-यग्य में साकळ हुय'र स्वाहा हु'ग्या ।

पाणीपत रो वेङ्गि में जद परवसता री काळो छाया भारतमाँ री ओर प्रसार कर रै'यी हो उण समै सूं ही रणवांकुरा रुद्र रूप धार'र ताण्डव करण लागा । आजादी री लडाईं रो लाम्बो इतिहास रूंगटा खड़ा करै अर पग-पग पर माथा अरपण करणियां री याद आवंता ही स्रद्धा सूं सगळा नमन हुवै । इण यय्य रो सम्भाषन पनरै अगस्त, सन् उगणोस सी संताळोम रै दिन मानीजै पण अमली काम फेरू हो सेस रह्यो ।

वोरां रो पवीत चरित ही इण काव्य रो कळेवर है । राजस्थानी साहित्य रै निरमाण-काळ सूं अजू ताईं लिखीजणवाळ साहित्य में जू'भारी भावना दूध में रळियोड़ माखण ज्यूं सगळी ठोड व्याप्त है । देस, घरती'र

कुल-मरजाद री रिच्छा करतां थकां माथा कटावणियां अर बलिपथ रै राही मा' पुरसां री कमी नीं रही है। आ बात साँची है कै जूँभार सबद सागें थैक इस सूरमें री चितराम आख्यां आगें उभरै जको समरभोम में सीस कटियां पाछे भी लड़तो रै'वै अर करवाळ छोड़ै नहीं। पग पाछो दियण री जिणां नै आण हुबै अर 'गुलामो' सबद नै जका गाळ गिणै।

स्वतन्त्रता सारु असंख्य सूरमा हरखावता थकां सहोद हुग्या। बां कितरा कस्ट सह्या-उणां री बखाण करण री सगती किण में ?

इण काव्य में पनरै प्रकास है। नानारंगी जोतां इण मे जगमगावै अर प्रकासमान हुवै। पैलै प्रकास में बीरां रै मुभाव रो-आजादी रै दीवानां री गुणगान है; बीर-भाव री बखाण है। इणी भाव नै सजोयो है आगे रै 'प्रकासा' में। स्वतन्त्रता-आन्दोलण री अमोल मणियां री चमक-दमक जग-मगाहुट करै। पनरै अगस्त, जगणोस सौ सेताळोस रै दिन भारतमाता रै 'बोध-कथण' (आसीसां) सून इण काव्य री समाहार हुयो है। बां कह्यो-

"सगळा हिळमिळ आणेंद पावै
सगळा मुख-दुख में अंक भावै
बस, रिच्छकरण आजादो
सगळा मन हुयसे सद्-सभावै

आजादो रै इतिहास री तानो-बानो बणावणियां दिव्य-पुरसां री गाथा लिख'र आ लेखणी धन्य हुई है। बां री प्रेरक-सगती ही इण में साकार हुई। उण आदरजोग जोतां नै कोटी-कोटी प्रणाम !

क्रम

१. वीरां गुणां वखाण	१
२. पावन-प्रताप री आण	८
३. हल्दीघाटी री याद	१६
४. आयम्यो तमतमाटणो सूर	१६
५. शिवा रूप साकार	२७
६. सगती लिछमी सार	३२
७. घर्म री फेर जगाई जोत	४१
८. राष्ट्र-आन्दोलण री दृढ़ नीव	४५
९. सुमरणै जळियांवाळो-बाग	५३
१०. जोस जद हुयग्यो उजळो आग	६१
११. सीख श्रद्धानन्द जी रो साख	७७
१२. केसरी-जोरावर-प्रताप	८८
१३. गूँज भारत-छोड़ो री छाप	९५
१४. रटण रट खून करो बगसीस	९९
१५. प्रकासी स्वतन्त्रता री जोत	१०६

वीरां गुणां वखाण -

पावन प्रताप नै कर प्रणाम
सुभटां दिव्यां रो नांव लियां
सुभ स्वतन्त्रता रो जोतां सूं
अज्ञान-तिमिर रो ध्वंस किया ११।
कर भारत-मां रो याद खरी
चितोड भाव रो लियां छियां
सगळां अमरां नै नमस्कार
नित काम सरै जिण ध्यान वियां १२।
चां राजपाट-वैभव सुख सूं
मायड़ खातर वैराग लियो
निय दुःखां सूं अणवाकिफ हुय
आजाद हुवण रो नेम कियो १३।
दर-दर भटक्या नीं भुल्या कदै
ते तण्यां मेर उपमा ताई
लंकाळ सूर नाहर सिरखा
जिण हाथाळै लाली छाई १४।
वै मायड़-लाल धकाधक कर
मां रो बेइयां नै काट करै
कितरां पिमुणां नै भेज सुरग
मन मोत चिढ़ाणां सय डरै १५।

उण नै मरणै रो कोड़ घणी
 वै कूट करै जमवूतां रो
 अँ कदै न डरणा अरि आगँ
 रे ! पदवी पाय सपूँयां रो ।६।
 रण दूध ऊजळै जामण रो
 चढ़ रण-सय्या आराम करै
 जण इसड़ा रावत जळमभोम
 जिण बंका-डंका अमी भरै ।७।
 वै सतवन्ती रा वर बालम
 हर घड़ी खुमारो छाँय रही
 कद चूकै भौकै टोकै नूँ
 कुण परवस उण रो मात करी ।८।
 मां ब'नां रो सुभ वातां नै
 अँ कदै न भूलै आराणं
 खुंदड़ी-पंवरी रो रंग चढ़ै
 भू . कदै न कस्टै आराणं ।९।
 रिण भार उतारै भूमी रो
 । अत्याचार्यां नै खूँद - खूँद
 कुण वसुधा उण रो दाव करै
 उगरावै पाछी बूँद - बूँद ।१०।
 वै नाहर सिखा बळसाळी
 दानी वारिद - रुखां जिसड़ा
 ज्ञानी - बैरागी - प्रणपाली
 आज्ञाकारी रावत इसड़ा ।११।
 वै मड़ मड़ मड़ वाचाल नहीं
 धिन साजन मुनि इम व्रतधारी
 सै काज जगत रा सूधा सट
 उण रो निजरां नीं भ्रमकारी ।१२।

भड़ भार ऊतरे घरणी रो

खल - दुस्टां नै कर चूर - चूर

कुण इला उणां रो दाब करे

उगरावै बण वै सूर मूर ॥१३॥

खंगड़ हद पूत सपूत खरा

माता रो खुसियाली ? चावै

सट रहिर - पसेऊ सींच - सींच

मायड़ - भू रो जस उजळावै ॥१४॥

रण रात-दिवस ही लाग रै'या

जननी रो जस वरधापण नै

पच नई रोसणी परगासै

नित जगमगकारी कण - कण नै ॥१५॥

मों स्वारथ मन रै अरमाणै

कद घोर - वीर भुकणैवाळा

पण पद - पद पर टक्कर पाणै

मर आण - माण मू'छांवाळा ॥१६॥

वै कज्ज करे हुय मतवाळा

कुण हुय बाघक उण राह अड़ै

कुण भीचु सामनै कूट करे

पेखत जमदूतां आह पड़े ॥१७॥

जिण रै पयाण माचै कळमळ

रिपु गिणै, जिणां नै महाकाळ

सुण नांव नास दै सगळो वळ

सागर गिणनो कद ताळ - पाळ ॥१८॥

हुंकार करंतां वीरां रै

कुण सामो जीवै सालकंवर

जिण जिन्दगाणी सू' मो' नहीं

भड़ रण में दीसै कंवर - भंवर ॥१९॥

वे आरावळ सा अड़िग वणें
 सायर - सी गूँजें लै'र - लै'र
 बड़वानळ नें कुण रोक सकें
 चूकें नीं, लेवें तुरत वर ॥२०॥
 वे कदै न मूरत रें वस में
 वर मूरत कुंत - क्रिपाण बीच
 सहू घड़ी सुलपणी मुखदैणी
 कर विजें करे भरि माण कोच ॥२१॥
 मायड़ रो दूध ऊजळण रो
 नित ध्यान राखणा आराणें
 उण रें जीवतें निहचें रह
 भू कदै न रै'वें भाराणें ॥२२॥
 जद सेना रो बाढन्त जोर
 कुण रोक सकें भारगियें में
 जिण लक्ष्म अक ही धार लियो
 फणि कूण पकड़लें वगियें में ॥२३॥
 जद अक करे फूँकार जाय
 उण विस उतार नीं कह कोई
 वे घाव हवक्का वीर वरें
 निहचें कीरत जग में होई ॥२४॥
 किनरी मां - बेंनां हेंस - हेंसनें
 लालां - भायां नें विदा किया
 छितरां-छितरा पिसुणां नें छिनि
 जीवन - जस रो वें जाय जिया ॥२५॥
 हर घड़ी एक रट लाग रही
 सिधू - सिधू सुम गाणो है
 अरि पीठ देखलें आराणें
 उण सून आछो मरजाणो है ॥२६॥

जद माता विलखे आसा में
वेटां - पोतां री हेज घर्यां
तद कितरी देर - अबेर तकै
पूगें वंधण नै काट कर्यां ।२७।
वै लब्बडधक्कै लेवण में
कद थोड़ी देर - अबेर करै
नी तैयारी उण बीरां नै
दाकाळ्यां मिरतु - लै'र भरै ।२८।
उण आंखइल्या रो तेज उरै
मूँछां तम नै सच सेत करै
पण लालइली घण आस पास
सर - रुहिर हथळकां हेत सरै ।२९।
भड चालै जद वसुधा कांपै
कांपै थर - थर हिय काचां रा
ते आंधी - पांणी - तूफानां
नी गिणें खनीड़ा टांचां रा ।३०।
रिभ तरवारां अर कुंतां री
घमरोळ मोकळी देखीजै
तद काळजिये री कोर तेज
पग मांड राड़ भल पेखीजै ।३१।
जद सात तुयारां रै पावां
जाणें वेड़ी पड़गी काठी
रुक केम करै लाचार रवी
मोवें घोड़ा चालै माठी ।३२।
खं आकासं छावें खं - खं
दीसैं सुरज जिम दड़ी - दोट
किंवा भतूळियं गेण कट्यो
मोटो किन्नो लोटंत छोट ।३३।

पण मीचु खडी पग मांड पास
 निय जीब लपालप लाल करै
 श्रे गरवीला भड ऊभ - ऊभ
 उच्छ्राव करन्ता चाल ठरै ।३४।
 जम भरता मारै सहस जणां
 सत धावां रो घमरोळ सहै
 कुण उफ उण मूंड सुणो कदै
 बाळा रण - खेतां रुहिर वहै ।३५।
 वै धन रै चक्कर में न कदै
 निय काया नै चकरी करणा
 रे । माण भोकळो मायड रो
 कर फरज कजा सपरी मरणा ।३६।
 वपु पांच तत्व रो पुतळो है
 आ बात उणां हिवडै धारी
 आतम - नत रो गीता बांची
 कुण मारै - काटै बलकारी ।३७।
 जद मरणो है निश्चै जग में
 कुण अमर वपू सांगे लेग्या
 मारग अपजस रो महामीचु
 रण पौढ वीर सांची कंग्या ।३८।
 पण नांव अमर जग में पैला
 मरणो . जस अमर सवाय मिळै
 किम तरै चिरमियां मोत्यां छिन्न
 भेडां सेरां सूं केम भिळै ।३९।
 कितरां वीरां रो रुहिर बै'यो
 कितरी लासां भूमी पाटी
 कितरां लंकार्ळां . रा पंजा
 काठी मां रो वेड़ी काटी ।४०।

धिन-धिन उण लंकाळां धिन-धिन

वड़ मातावां पर बलिहारी)

जिण पूत - सपूतां नै जाभ्या

चहुं ओर करै जय - जयुकोरी ॥४१॥



पावन - प्रताप री आण

२

परवस जद भारत - भू हुयगी
मुंगलां री फौजां आय जमी
राणा सांगा री भेट आस
बाबर - तळ हेठें जाय यमी ।१।
जद पाणोपत री वेढ़ि बीच
दुरभाग आवंतो दीस हो
धीरै - धीरै बढ काळ रात
गळतै कागद जिम फीस हो ।२।
जिण माण - पाण राखण चाही
निय असु री परवा कदे न की
खिण-खिण खिण प्रलंभाचणो रवि
हा ! आयम री तैयारी हो ।३।
कुण भार सांभमी मायढ़ रो
कृण हाथां कुंत - कृपाण करै
कुण घूमन्तै मैंगळ - जिम जा
महती वीरां रो मोचु मरे ।४।
हा ! आज बूडतै कुण काढे
दढ़ नक्र - सूर दातांवाळो
किण हातां रिच्छण डोर छोड़
कुण भार सांभसी मतवाळो ।५।

जदे कवळ अकली जवामदे

टकरै दंताळी पार करै

कुण सामै टक्कर रै टिकणो

जिण देखण लोही - जाळ भरै ।६।

सांगाजी लोक पयाण कियो

सगळां सूर्रा मातम छायो

हड़कण-बड़कण ओ कीं हुयग्यो

दुःखां रो दधि सामो आयो

ओ उदैसिध बैठन्त पाट

भगड़ां - टंटां निय राज कियो

किण घड़ी जिलमियो वो नाहर

दुखड़ां सून अलग न होय जियो ।८।

पण फेर पळटियो पाट - पटळ

ओ प्रताप गादी सोभ करी

मख - तेज ऊजळ तमी मेट

उगतै सूरज री ओप घरी ।९।

सगळां आसावां नेक धार

मन धण उछाव लै रण लागो

अर पळळ - पळळ तडिता आभे

चमचमाट कर सीधू बागो ।१०।

वो कदै न झुलिया अरि आगे

मेवाडी भाण सवायो हो

वो रीत - नीत रो वारिध - वर

जस भारत - मात वधायो हो ।११।

उण भ्रूहां मूछां मोड़ कड़ी

तण रुहर रूप हवीड़ करै

सांकरड़ां रै वन सूकै में

धक दावानळ कुण जाय घरे ।१२।

वो रात - दिवस सोचै मन में

मायड़ रो करज उतारुंला

जिण जलम दियो पोपण करियो

हं दीनो वैण निभाऊंला ॥१३॥

मां ऊभी तामै सूक मोन

किंचित नीं मुख सूं वैण करै

खुसियाळी हुयगी निपट खूट

बख - भग सूं सावण धार भरै ॥१४॥

निय दुखियारी माता नै तज

कुण वीर पूत भड़ है बाजै

जद आसू मां रै बखां भरै

लख भोम सपूती है लाजै ॥१५॥

घीरज - साहस हृद निस्वयता

अर जलमभोम री खुसियाळी

उण वढ़ै त्याग सूं नेम कियो

पातळ मायड़ - हित प्रतिपाळी ॥१६॥

रण - माटी रो हृद वज्र-रूप

कद दुख - भंभा डगमगवाळो

लठ हियो अड़ावळ अड़िग नियां

भच चढायो नाहर मतवाळो ॥१७॥

अन्यावां नै कद सहै अड़िग

अँ आण - भाण करणवाळा

नीं कदै अड़ीकै मोके नूँ

मन चढ़ै खुमारी मतवाळा ॥१८॥

पावन - प्रताप रो नांव पेख

चख-मग में चपळ चौघ जावै

भट, चरण-कंवळ सिरिसीस भुर्क

सरघा रा भाव हिये छावै ॥१९॥

राणा सागै वै बाल - रवो

वन-वन री खाक खूब छाणी

अर जगमग रै कारण सूं अण

जीवण हरखाणी कद जाणी ।२०।

कुम्भलगढ़ में बाळापण वय

चितोड़ पूगियो नर - नाहर

तळहटी दुरग में डेरा दे

वर यूथपति कंवळा - डाहर ।२१।

भीलां रो हो हितकर भोडू

जगळां सूं उण घण हेत कियो

वन-वन भटकयो पण भुक्कयो नही

वो कद मुख री जिन्दगाण जियो ।२२।

सिध जन-जन में इतरो घुळग्यो

जन नै जनता सूं अक भाव

खाणो - पीणो सागै सहू रै

सपरो सगळां हितकर सभाव ।२३।

बत्तीस बरस री वय में वै

कांटां-जड़ियो सिर ताज धर्यो

पनरै सां वोवत्तर में पण

भल पाट उदपुर नाज कर्यो ।२४।

पुज सिसोदियै कुळ तेज प्रगट

जस घबळ प्रकास्यो हृद भारी

कछवाही - साही कटक-कटक

ध्यारी वेड़ी री की सारी ।२५।

समराटां रो वो सहनसाह

वो सिध - केसरी बलमाळी

घन-स्वारथ रो नी धर्यो ध्यान

बाजो उण अक हाथ ताळो ।२६।

पण जठे मानसिंध मूँछ पाण
 मेवाड़ी पाग पगां चाहो
 उण कूट नीत री पाण आण
 साही खिदमत लाली छाई ॥२७॥
 मुख कूटचाळ रं घणी मान
 पातळ सूं मुळै करण चाहो
 संदेशो नमन करावण रो
 साही फरमायस पूंचाई ॥२८॥
 पण घरम - घुरीणां में प्रवीण
 भल तेज किसानू सुभ पबीत
 मरवस होमै पण भुँखै नही
 डूंगर धारै कद शोणम - सीत ॥२९॥
 जद चोट पड़ी सदेसै री
 भुखणै री सवणां सुणी गाथ
 तणगी मूँछडल्यां बांकडली
 हं - हं ऊमडतै तण्या माथ ॥३०॥
 कुण ताखांरै विस रो पाचक
 कद ना'र हिरण - घर नीर भरै
 कुण तेजडळा भट वीरांरै
 सामी छाती ललकार करै ॥३१॥
 जद हळकारै सामो देख्यो
 इक तप्त मूर्ती आगै ही
 आंस्यां सूं अंगारा चम चम
 काया भड - आतम बागे ही ॥३२॥
 सदेसै रा छकड अस्खर
 मुणतां गज्यो किम नेत्र टरूं
 कुण माण घटावै मायड रो
 तू भम सूं जुघ में नही डरूं ॥३३॥

हूं करी प्रतिग्या सह सुणलो
 इक्लिंगजी नेम निभावैला
 साही दरवारै जीतै - जी
 ओ कदै न पातळ जावैला ।३४।
 चाओ तजदै रवि तप्त-भाव
 सीतळतां नै निसिनाथ तजै
 पण भाणवंस रो ओ पातळ
 ओ ! कदै न अकबर नांव भजै ।३५।
 वाळू सू निसरं तेल भला
 मिसरी तज दै निय मधुर भाव
 दधि तैर पार छंठ भल करलै
 नी पातळ पळटीजै सभाव ।३६।
 सूरज पूरब में ऊगणिघो
 चाओ पच्छिम में उदै होय
 पण सूर्यवंस में उपजणिघो
 जोणो चावै नी भार डोय ।३७।
 हूं जिण भूमि पर जळम लियो
 उण रै खातर मर जाऊंता
 नीं आस करै अकबर म्हारी
 ना जीवित दिस्ली आउंला ।३८।
 नी दूध पियो हूं लांकड़ नी
 हू सिघणी रा थण पान किया
 उण जैर लिपटिये आंचळ में
 किनरो जीणो, कुण अमर थिया ।३९।
 जद ओठ दिवस तो जाणो है
 तद वारवार क्यूं मरण सहूं
 हूं नमन करूं एवलिगजी नै
 वन्दगी अकबर नै केम कहू ।४०।

यस, आज आखरी निरण है
 इव कदै न सदेसो कहसो
 कच्छावां-कुळ रो कंवर मान
 निय ठोड़-ठिकाणै हो रहसो ॥४१॥
 हूं कदै न घमवयां सूं डरणो
 नी सुख-दुख में चख भेद करूं
 भायड़ रें दुख सूं दुखी मनां
 हूं पातक सूं घट नही भरूं ॥४२॥
 है मान अेक पथ रो राही
 हूं बीजं पथ रो राह करी
 किम भळ करूं तप-तेज कदै
 कुण दुज-बारस इक ठोड़ चरी ॥४३॥
 आ बात सुणन्तां दूत गयो
 उण अरावळ सो अड़िग जाण
 मन ही मन नमन करंतो वो
 हिय जाण प्रकास्यो तेज भाण ॥४४॥
 अर सायर गुहिर अनळकारी
 हृद उवार हिय मे माच्यो हो
 भट हाथ लेय निय मीत कुंत
 चख तडित चमाचम राच्यो हो ॥४५॥
 हूं आज ऊजळूं धवळ जसां
 रज-मेदपाट रो प्रजळाऊ
 भल भारत-भू रो वची लाज
 हूं असि-कुन्तां सूं उजळाऊं ॥४६॥
 परवस ह्य जग में जीणै सूं
 आछो सपरो मरजाणो है
 श्री नूतो दोधो मान इसो
 सीधो नरकां-घर जागो है ॥४७॥

कतरो-कतरो उण लोहू रो
 मायड़ रो फरज उतारैला
 सिव इकलिंगजी रो सांय सदा
 वै ही बुघ - बल दे तारैला ।४८।
 यस अक अरज है इष्टनाथ !
 सदबुद्धी मम मन वसै सदा
 इण अस्थिर काया माटी 'नै
 कुड मो' - माया नीं कसै कदा ।४९।
 म्हे तन - मन लूँ हां साथ नाथ
 सहू साथ्यां भट हुंकार करी
 अर हूँ - हूँ सूँ आ धुन उमटी
 हामळ सगळां टंकार भरी ।५०।
 सहू अक भाव में बोरीज्या
 सगळां हिवड़ां में ज्वार भर्यो
 वस एक ,हिलीडै कट कगार
 सगळां कर नमन जुहार कर्यो ।५१।



हल्दीघाटी री याद

भारत - भू पर भामणा
 आ अमरां मन भाय
 हूण रै खातर मानखो
 प्राण अरप सुख पाय ।१।

राजस्थानी भोम री
 हरियाळी हरखाय
 सूरों वीरां री सदा
 फूलें फसळ फळाय ।२।

वीरां री वीरापणो
 काट बंधाणां काट
 पातळ जस पायो परम
 प्रकट उदैपुर पाट ।३।

हल्दीघाटी नांव सुण
 हूं - हूं उमगें जोस
 वीर पोढिया तोपणा
 मान करण निरदोस ।४।

वीर लङ्का हित देस रै
 श्रेक - लक्ष्य - इक - भाव
 खांडां तरवारां खणक
 जोस अर्यो साभाव ।५।

वीरां रो वीरत्व वर
 वीर भाव साकार
 मा'राणा पातळ महा
 बढ्या करत हुंकार ।६।
 घग्म-घमाका वीचि में
 फटाफट घड़ घाड
 महाकाळ रो रूप घर
 पिसुण—कळेजां फाड़ ।७।
 सोनळ धरती कारणें
 जळमभोम हित चाय
 घणी वीरता सू लड्या
 सूरज पदवी पाय
 पनरै सें छीयन्तरै
 रण रच राखण माण
 अमर नाव जग में कर्यो
 हळदीघाटी थाण ।८।
 प्रीसर चूकं नीं कदा
 वीर न दूध लजाय
 पण पाछो पण दियण रो
 मन वीरां नीं दाय ।९।
 हँसता-हँसता भल भिड्या
 जळमभोम प्रजळाय
 रगत—रंग्यें जस घवळ नें
 केम वखाण्यो जाय ? ।१०।
 भारत भू रा लाडला
 माण पाय भरपूर
 काज देस रै कस्ट सह
 सूरज जिम तप सूर ।११।

आथम्यो तमतमाटणो सूर -

४

जीवण ! तू कितरो धोखो है
 तू खांड लपेटघो काळकूट
 तू सरसर करतो वै जाव
 सगळो सुहिणो फूट जाय दूट १।
 खिण भवस करूं पुरी खिण-खिण
 पळ-पळ घड़ियां री फूट-फूट
 म्हारै-धारै उळभाव भरघो
 जीवण रो घड़ियो जाय फूट २।
 जीणै-मरजाणै में ह्या तो
 कुण जीवण री मै'भा जाणी ?
 कूकर-सूकर सम भ्रम जेम
 कर लटवा कूड़ खाक छांणी ३।
 पण पड़े जावणो अक दिवस
 राजा-सेवक नर-नार धीर
 कुण टाळ सकै प्रतिसर्ग घड़ी
 धुर जोदा-चाअे अतुळ धीर ४।
 काळजिये में बा हूक करै
 उण नांव लेवता उठे पोड़
 बा रात गिणै नों दोपारै
 अकान्त गिणै ना गिणै मीड़ ५।

छानै-थोळै वा नों छोडै
छोडै ना वा मिन्नत करियां
पण पकड़ पछाडै वादे पै
आ तोड़ै तिणकै री वरियां ।६।
ज्यूं ओके लसरकै माछर नै
जमलोक भोजदै मारणिया
ज्यूं कीड़ी-माखी मारण में
नों सोच करै पापी हणिया ।७।
पण काळ गिणै नों पाप-पूष
वो भाय बळै अणनूतै ज्यूं
दम टेम खिणिक ही नों देवै
डरपै सगळा उण दैत्य स्यूं ।८।
लपलास लपलसी रसना नै
लड तोड़ सकै कुण वांकड़लो
सिघ-वज्जर रै पंजा बिच सूं
भिड़ बच जावै किम लांकड़लो ? ।९।
जिण री अदीठ गजन सुणनै
भट होसो-सांस कूंच करदै
ऊंची-नीची धुग-धुगी हुवै
रग-रग में रोग-सोग भरदै ।१०।
आंख्यां दीठै घण अधियारो
जोती ना टिकै परी जावै
टूटै बाणवको नाड्यां रो
हा-ओय कियां वचणो चावै ।११।
जिण गळपटियो गळ में धार्यां
नाहीं निय जिन्दगाणी गाळी
सच डाकी ठाकर राग-सरस
भल पाळ स्वतन्त्रताई पाळी ।१२।

जिण सह सुखां रो त्याग कियो,

दर-दर भटक्यो पर्ण, मुक्यो नही

हृद आरावळ रो अङ्गि हियो

जीवण दुखड़ां सूं मुक्यो नही ॥१३॥

जिण ललकार्यो वैभव-सुख जद

संघरसां री मुम पाळ रली

कस कफण बांधियो केसरिया

फळ कोमळ फळ री कड़ी फळी ॥१४॥

मच गिणै मोचु नै माखड़ली

सो कदै न डरपै डक्कण सूं

क्षण वीरां नै घडिया इसड़ा

कुण डक दै उण नै डक्कण सूं ॥१५॥

खुल्लम खारा वै खेल-खेल

नित कूट करै जमदूतां री

जोवै वै रात-दीह जिणनै

करणो कुण होइ सपूतां री ॥१६॥

वै तपै सदा निय तेजां सूं

कुण देख सकै सामो उणरै ?

वै निजर गिहावे जिण वेळा

घरती थम्मै भटकै कणरै ॥१७॥

कच्छप री पीठ हिलोदा लै

भूकम्प हुवै टंकार भरघां

फण सेसनाग रा कम्पीजै

हड़कम्प उठै मनवार करघां ॥१८॥

वै इतिहासां रै पत्तां नै

सोने रै अखरां सूं मांडै

वै नांव उजाळै जामण रो

फट नुंवां पगलिया भल छांडै ॥१९॥

वै समझो तो नीं करै कदै . . .

नीं दुःखां सूं टरणैवाळा

वै रात जिलमिया इसड़ी वर

. . . महु . . . रै दुःखां हरणैवाळा । २०।

वो कड़ो रूप . कीकंजी रो

पूरण जगती हुवतो दीख्यो

जिण खेल खेलिया दिव्य गजव

. . . सिंघणो रो सीख . खरी सौरयो । २१।

रै कंचन-काया . महावीर रो

. . . अकड़ जकड़ती जावै ही

वो दीप्त तेज च्यारुं 'कांनी

. . . अस्तंगत आभा छावै ही । २२।

वो तणियों वक्षःस्थळ रवि रो

इव सिथळ मसोख्यो दीखै हो

पण आख्यां री . बा आध चमक

. . . विद्युत सरणाटै कीकै हो । २३।

मन उथळ-पुथळ धमरोळ मची

. . . भावां रा भाव तण्यां भारी

चै'रै री वंकिम रेखावां

. . . उरम्यां रा ताव बण्यां खारी । २४।

सत भाव आयनै हिवड़ै . सूं

. . . जीभड़ली सूं टकराव करै

पण आगो-पाछो देख-देख

. . . अफ . . . वण बारनै नहीं भरै । २५।

गिट गिटक-गिटक उण भावां नै

. . . अकभोर दिया साथीडां नै

कर बैठा-बैठा सोच करै

किम गिणै सिंघ हाथोड़ां नै । २६।

जिण रै पमाण हुवती कळवळ
जिण निजर माचती मोचु-जाळ

रत कीको सूरज भारत रो
भड़ वीरां री भळ खरो माळ ॥२७॥

मछ सूनो आज थपेड़ां में
कीं भाव-बीचिकावां गैरी

जिण सुमन गिण्या घसि कुन्त असु
वो काळो काळकूट जैरी ॥२८॥

खुद ताखां रो विस खरो-खरो
कुण उण री होड़े करे गिरी

भल पत पर बैयो ऊमर भर
वैती सरिता आपे ठैरी ॥२९॥

कीकै नै अरज करी सगळां
मन-भावां नै कर रोक-राक

चख-मगां स्रोत भरतां-भरतां
पिघळे हिवड़े नै ठोक-ठाक ॥३०॥

जी, बड़ो हुकम फरमाईज्यो
कीं वात अटकगी कण्ठां में

ऊमा चाकर चरणां अरपित
मछ डरां न बीड़ण गंठां में ॥३१॥

स्वामी हो म्हांरा धुर पवीत
हां बळियारी श्री चरणां पर

सहु काळजिये री कोर-कोर
मच-माचे काटणा पिसुणा सर ॥३२॥

प्रण करां प्राण-पण सूं पुरो
सिव इकलिंगजी री साख करां

नों वादे सूं विमुहा नाठां
मेवाड़ी पाग न दांग धरा ॥३३॥


जदताणी रत री अके पुटंग
रैसी-रैसी इण डोळ मांय
नीं वैण तोड जीणो चावां
चलती-फिरती लख छांव छांय ।३४।
प्रभु ! इतरी मै'र करो जल्दी
म्हे सैणै सकां न देख पोड़
दो हुकम हणै माचां कळवळ
पिसुणां री करदां भीड़ छीड़ ।३५।
कीं गुना ह्यो भारी म्हांसू',
नीं कदै छिपाई कई वात
भल ह्यो किसो अपराध बड़ो
हां वैंठां सगळा अके छात ।३६।
सं चावै इमरित वैण सुणण
स्रवणां रा पडवा उल्लासित
आसू भारन्ती आखडियां
हुयसो धां सुख सू' हुल्लासित ।३७।
आ वात सुणी घिर भाव कियां
असि-कुन्त निरख गंभीर ह्यो
अर छोड़ निसासा कूँकारण
राणा सह प्रमुखां मीर ह्यो ।३८।
भावां री लही पिरोयां भल
गदगद कण्ठां सू' वैण भर्या
सह वैंठा सुणता चुप्पीकर
सुणणै उत्सुक पृट-स्रवण करधा ।३९।
मद्धिम दीपक री घाट जेम
बुझती-बुझती घण परकासं
दिप अेम बुझतो रतन-दीप
मुकती-मुकती अण-ऊजासं ।४०।

वं तणें भुंवारे वेंण कह्यो
 म्हारो ओ दीप कुण धारें
 सुभ जोत जळाई जतमां सूं
 तूकानां तरणी कुण तारें ॥४१॥

धमरोळ - मचें - मन सोच घणो
 की कहूं अमरसिंघ रें खातर
 ओ टावर हे, नीं पक्यो अजें
 नी सुखां रो सपरो पातर ॥४२॥

सच वचन करूं म्हासूं सपरो
 कुण नीं सन्धी रो हांम भरें
 जदताणी जिन्दगी में जिन्दगी
 दैरो रा चक्का जांम करें ॥४३॥

नी ताज कमल अर फूलां रो
 ओ तखत न सुल रो सय्या है
 ओ राणा सवद न आरामें
 पण सबसूं ऊंची मैया है
 कुण भारत - मां रो दूध सुमर
 कुण रजपूती ऊजाळलां
 कुण भारत मां रो वदन निरख
 बूठा वर्यां रा बाळला ॥४५॥



रिस वेंण कह्यो अर राणाजी
 चुप हुयम्या चाय पडूतर नै
 सगळां मुख ओक बात आणी
 नीं कदै हटां रण ऊतरनें ॥४६॥
 आथूणें ऊणै जाय रवी
 चाभे ऊगळें ससि आग आय
 चाभे चकोर पत नें तोडें
 पण म्हे पळटां नीं लगा लाय ॥४७॥

इण जोनी नै प्रजळावालां

पच तन - मन वारां मायड पर

कतरा - कतरा खूँ रा वें'सी

पण दाम लगै ना वेजड पर १४८।

आस्वासण पाय प्राण - पण रो

मुरझायो गणो फूल उड्यो

जीवण मुक्ति पा मुखी - मुखी

जग सूँ मो' - माया थंघ छुट्यो १४९।

वो पूज्य लाइलो मायड रो

मायड रो काज सही करायो

खप जोत जळाई निपट खरो

सगळां मन देसप्रेम भरयो १५०।

मायावी मो'रै चक्कर में

स्वारथ रा बीज पनप पावे

नीस्वारथ जीवण त्याग करै

उण नै नी कदै काल खावै १५१।

पावन प्रनाप रं नर - वर तनु

पायो अमरत्व खरो जग में

वो निपज्यो पून सपूत खरो

नीं भटवयो जीवण रै मग में १५२।

पातळ रो नांव अमर जग में

जम उजळो दीप्त प्रकास भर्यो

बेदाग चमकणो धुर - प्रबीण

सूरजवशी रवी पूत कर्यो १५३।

आंसूडा भरतो आंसूडियां

रुकिया कण्ठां किम वैण भरै

तत पांचू मिल्यां पंच तत में

अतुलित बल रो कुण तोल करै १५४।

शिवा रूप साकार

५

सीस नवाळं सूरसिरी
 वीर सिवाजी वार
 कदं न हिवडो कळुपियो
 सिवा रूप साकार ।१।
 सदा सुलपणो सोवणो
 आजादी रो रूप
 केम निभावं उण कदं
 जबरदस्त जग - भूप ।२।
 हियो मसोस्यो जद घणो
 देख बंधणां मात
 मोम वण्यो मन मोवणो
 वण्यो वज्जर गात ।३।
 आजादी री जोत वण
 जीवण - नेह संजोय
 घाती - भावां वीरता
 अस्ति - सू' जगमग होय ।४।
 मन मौजी मन सू' कियो
 मां , रो माण - सवाय
 रिच्छक खुद सिवराज जद
 कजा . कर्त कुण जाय ।५।

सदा सुरंगी चाल शुभ
 भिड़े काळ सूं जाय
 करै वीर हुंकार 'वम'
 काळ न सामो आय ।६।

उचित न्याव रै कारण
 जय - जयकार सदाय.

सहु धरमां समभावणं
 द्वेस न किण सूं थाय ।७।

काळुपियां जद हद करी
 जद सै हुयग्या भीन
 उणी काळ में उमगियो
 भीणे वारिद भीन ।८।

छोटै वपु हीमत छटा
 किण विघ करुं वखाण
 वामन - रूप धर्या छळ्यो
 अरि - बलि दुष्टा आण ।९।

अफजल खाँ री चाल कटु
 चली न साम जाय
 पकड़ पछाड्यो केसरी
 निकसी उण मुख हाय ।१०।

घणो क्रियो छळ हद करी
 अफजल - अग मक्कार
 पण गरज्यो लंकाळ जद
 अरु भपटै मार ।११।

सिध साम कीकर लड़े
 सुसियो अर गजराज
 हाथाळ हणनो हटै
 अरुळ भिड़ अगिराज ।१२।

मायङ् देखे विळखणी

कुण इसडो जग - पूत

आसु जननी आख अर

देख बण्यो जमदूत ११३।

सागर - रण सरणाट में

धूँ - धूँ धूँवाघर

कदे न कायरता करी

कर्या वार पै वार ११४।

रामदास मिळिया गजब

गुरु जिणन मंभीर

सिद्ध - दिद्ध गुटकी सही

समझ चलायो तीर ११५।

पोगातो वो तुरत ही

मां बैनां निय ठोड

कदे न मन मंलो कियो

घिन - घिन ऊजळ मोड़ ११६।

अक दिवस री बात है

धीठ - राज दरबार

राजकाज - चरचा विच

आयो इक सरदार ११७।

जीत - खबर सांभळ जई

पेख साथ चकंडोळ

इचरज सूं पूछी विगत

बोल्हो पड़दो खोल ११८।

तोफो इण में तोसणो

मिळ्यो भेट परमाण

भाज जुद्ध में जीतणो

भूक वघायो माण ११९।

इतरी सुण तेवर चड्या
 हुयग्या चल - पट नाल
 भगारा . बरसावंता
 हान करे बहाल ।२०।
 माथे "रा सळ फंलभ्या
 हाथ घरी तलवार
 रुं - रुं जाण रोसणा
 मूछा तणगी ना'र ।२१।
 कडक उठ्यो भट केहरी
 रे घूरत भवकार !
 दुष्ट करी येँ दुष्टता
 डूव्यो काळी घार ।२२।
 आ काळस धुपणी अरे !
 सोणित घार मंभार
 पण, पण पापी पापिया !
 भूमी माथे भार ।२३।
 पापी, काळख पोतणा !
 क्रियो माप - आचार
 कींकर सामे इव खडो
 मरजा ओ लाचार ! ।२४।
 फेर मुखातिव हुय परे
 कंपित बोल्हो वात
 माँ माफी देवो मन
 दुष्ट करी घण घात ।२५।
 म्हारी सम्मत . जे हुवे
 इण में रत्ती अक
 हियो चीर सामे घर
 टूटे . नी मम टेक ।२६।

आद भवानी आये

खड़ी उजाळी नूर

माफ करो, मां थे मन

गुनो हुयो भरपूर ॥२७॥

मां माता अम्बा खड़ी

आद भवानी रूप

हू तिवरु जिणन सदा

दुष्ट विदारं चूँप ॥२८॥

म्हारी सगती किम करै

सगती रो रखवाळ

थारै घर इष ही घड़ी

पूगावै रिछपाल ॥२९॥

मां पण विनती अक है

कष्ट हुयो भरपूर

करो कृपा पावन करो

करो पाप चकचूर ॥३०॥

कद न हू परवस बगूँ

मोमै मायड़ सान

जळमभीष हिन अरप दूँ

रेवै मोती - पाण ॥३१॥



सगती लखमी सार

व्योपारी बण आवणवाळां
 अंग्रेजां री जद पोल खुली
 जद घोरं - घोरं होस कियां
 डाकी - डाकां भू डोल डुळी ११।
 उण समं सहू आकळ - वाकळ
 खळबळी हिमां माचण लागी
 किम करां केथ सरणो किण रं
 हुयमी आवाजां अति घाघी १२।
 पण रणजीत सून हार खाव
 रण हारडिज तिवका पाई
 घर - वीर खालसा बाकडळां
 गम भेट मान खुसियां छार्ई १३।
 पण डोर समेट्यां परल पार
 दुरभाग सामनं दोसं हो
 काळो छाया में इणग - विणग
 मरिमोडो वचियो फीसं हो १४।
 जद डलहोजी री कूटनीत
 लोगां ने अखरण नें लागी
 सुरसा जिम मूंडो फाड खडी
 मानवता पडगी पड दागी १५।

हृद राजकरण विस्तार घणो
 सासन रो चंदोवो छायो
 अंग्रेजां फूट करणआळी
 नीती सूं फंदोदो चायो १६।
 जद फूट पड़ी वांकडळां में
 भाई नै भाई काटे हो
 पिमुणां रा पांव पखारण पण
 काळजियो सजणां फाटै हो १७।
 लड़ जलमभोम रा लाड़कँवर
 आपस में लड़णं री ठांणी
 छण सम बाड़ ही खेतां नै
 भवखण नै तरवारं ताणी १८।
 रंग - राग उड्यो भड़ वीरां रो
 निय खानदान री सुरत कियां
 तणगी मूँछ्यां मरदानां तद
 लड़ चावें बदलो तुरत लियां १९।
 छण आसावां विस्वासां नै
 किम कलम काठ री लेख करै
 जिण रो इतिहास लिखण खातर
 . रत रगत मसी . सूं काज सरै ११०।
 कथ फंवन - काया मोळ केम
 कागद भाडण किम समथ हुवै
 चर्प - चर्पै विरतान्त मड़्यो
 . अमरित - नीकर इतिहास नुवै १११।
 जळ आग लपालप भड़क उठी
 वा छोट भळकती पैली ही
 अस्टादस - सत सत्तावन . मे
 आजाद तरंगा फैली हो ११२।

चोखें मोकें नें कद चूकें
 मायङ - हितु फरज निभावणिया
 घे हुळस - हुळस हुंकार करे
 पाड़े विमुणां यस पावणिया ।१३।
 वे स्वतन्त्रता रा स्रोत खरा
 अवगाहण मृगत नाक राखें
 वस श्रेक बार में दिव्य वपु
 भड़ इसड़ों सांसो कथ भाखें ।१४।
 दट आजादी रे दीवानां
 आजाद हुवण रो नेम किमो
 भगलपांडेजी घोर महा
 भंडो तूकानी हान लियो ।१५।
 वां बटन दवायो तुरत वंठ
 लपटण पळटण रो लाल हुवो
 आर्याचार्यां प्रतिकार जता
 बीयो आजादी - बीज नुवो ।१६।
 कांसी रो सजा दइ खुस्टा
 मन वे डरता कद मतवाळा
 भेज कांटां - कस्टां सुखमानें
 वे आजादी रा रखवाळा ।१७।
 वां जीत जळाई इसी अलख
 लख आंखां खून उतर आवें
 वां रे उफाण रो श्रेक भलक
 कायरता - भाव परा जावें ।१८।
 वा आग लगी मेरठ में पट
 भट बीजापुर में जाय भरो
 गोरमपुर में निय रूप लखा
 भ्रू ताकत सगळी ज्वाळ भरी ।१९।

वा डलहोजी री चाल दीठ

भखणो अजगर हो भीमकाय

पच पसर-पसर कर खसर-पसर

धुम धणी मचाई चायमाय ॥२०॥

भड गटक-गटक घण भीमकाय

जद लाव-लाव री रटन लगी

लोभी - पापी रै किसो घरम

जग पूत अगम भट भडक जगी ॥२१॥

रच आस लपट्टां आसा री

चिणगारी नै विस्तार करी

सोचै विस्वास जगावण सूं

सगती सगती में अनुप भरी ॥२२॥

जद भांसीवाली राणी रै

खोळ री भात नकार करो

खबरां पूगी रणवासां खट

क्रोधण सिधणी हुंकार भरी ॥२३॥

है कृण जिळमियो भूमि पर

बहत पांणी नै रोक करै

है कृण जिळमियो धरती पर

नाहर थापड़्यां ठोक चरै ॥२४॥

निश्चमन वीरां रै मन नै

पण फोर सर्क कुण वमुधा पर

कुण रो मां सूं ठ इसी खावो

नाहर सामे ऊभै नोहर ॥२५॥

जिण री हुंकार मुणतां ही

कितर्रां रा प्राण पयाण करै

सामे देखें कुण उण जम रै

सामी छाती कुण जाय मरै ॥२६॥

धिन सतवन्ती लिछमी वाई
 नीं उलटी आग्या अपणाणी
 उथळो दीनो रणवासां सूं
 नी वात कदं भुखणी जाणी ॥२७॥
 वे आंख्यां आग बरसणी वस
 तिम तेज अगारां 'ज्वाळ जळ'
 सख भसम करन्तां 'लंकाळी
 भांसीराणी भळ भाळ भळ' ॥२८॥
 उण मरदानां नै मात कर्त्या
 धिन पुरस वेस भदभुत धार्या
 जद रास गही रण थारी की
 बांकडळां हरख - हरख वार्या ॥२९॥
 भड तुरेवाळी तेज 'भाम'
 सच माण - मरण मरणो सीख्यो
 कनिंगे डाकी जाळ - डाळ
 जाळी रस्सो भट पट खीच्यो ॥३०॥
 निच कांटो फेंक्यो 'फांसण नै
 चख - मखां भळां आवत दीठी
 पण पारा हो बो खरो परं
 माखी समझी जिण नै मीठो ॥३१॥
 रे ! छातो छेड टाटियां रो
 कुण मुख री नीद हराम करो
 दुरगा नै अबळा नार देख
 खळ भूल 'मोकळी करी खरी ॥३२॥
 कुट नाकावंदी खूब करी
 पण मायड जोस उफाण हो
 दधि मोवां नै भकभोर तोड
 कुण तूफानी गति जाण हो ? ॥३३॥

वा लें'र लें'रका लेण बड़े

कुण उण री थाहां तोल करै ?

रण ज्वाळ-ज्वाळ ज्वाळामुख री

विरतक होळी कुण बळे मरै ? १३४।

सीपेदाऊ नै कुण नूतै

कुण ऊंवे मारग जाण पड़े

पण आंधो हुय मद राज-पाट

वो ऊंवा - सूंघा खूब घड़ै १३५।

जामुण्डा रूप धर्या चण्डी

मतमाळी बा रण चण्डी ही

आग्या सुणनै कैनिग पण री

बा कदै न ज्वाळा ठण्डी ही १३६।

जिण महिसासुर नै पकड़ धर्यो

कर मरदन मही असुर मार्या

सट रगतबीज नै भेज सरग

बरसा - कारन्त अमर वार्या १३७।

जिण चण्ड-मुण्ड भट चूर कर्या

ना करी देर इक पळ भर री

विण रै हाथां में सस्त्र वेख

बलिहारी गाऊं उण कर री १३८।

अयि दोष हस्त या अष्टभुजी

अस्तादस चाग्ने वीसभुजी

माँकात्यायनि ! हृद रूप धर्यां

वर निजर पड़न्ता टीस वुभी १३९।

किम अंगरेजां री दुस्ट फौज

रण आय सामनै ऊभ सकै

जिण मनां हवड़का कपटां रा

भुसणा माया असि-भटक भुखे १४०।

वै यग्य मांडियो धुर पवीत
 मां लाइलड़ा आ'वान कियो
 बलिवेदी भांसी थाप बळ
 साकळ लिछमीजो हात लियो १४१।
 वै होता हा उण यग्य विचै
 पण यजमानी रो रूप धर्यो
 आतम - तत नै लख बार बार
 स्वाहा-स्वाहा आ'वान कर्यो १४२।
 वो अदभुत यग्य वरंकारी
 साकळ जिण री जजमान बणी
 निग्र होम वपु कर स्वाहा धुन
 घर जोत प्रकासी घणी घणी १४३।
 रण में पूगी कर विजं करण
 अर रूप प्रचण्ड चण्ड करियो
 हातां में अति चमचम करणी
 भट सगळां जोस गजब धरियो १४४।
 तिम बेहूं हाथां तरवारां
 वारां पर बार करण लागी
 गडगड़ा'ट करतां घम्मगड़ा
 हुय तितर - वितर भागा बागी १४५।
 जद जोस सौगुणो भर जिव में
 वै पीछो कियो हकाळा दे
 पण घोखे सूं धिरगी पनगी
 विस फूकारी जीवां वे - वे १४६।
 पण हात दोय भल जोर कर्यो
 हज्जारां हाथां मात करो
 दुरभाग पीटणो आय मर्यो
 भू'डें नाळ हद घात मरी १४७।

घोटक नूँवो असवारी रो
 हो अकड़ - जकड़ तणैवाळो
 तण अड सगाई ढील छोड़
 वळियो मग ऊफणतो बाळो ।४८।
 वळग्यो अडग्यो तणग्यो वैरो
 मोचू रो दुस्ट बण्यो साथी ..
 कितरो घोखो उण दियो मोच
 लानत ' इमई साथी घाती ।४९।
 बा आई वळगी बदवेळा
 अस्तंगत हुवो रवी दोस्त्यो .
 सख करां पसार्यां लाल-लाल
 जळ बीच वतासै जिम फीस्त्यो ।५०।
 सौभाग धिऱ्यो हा! चहुं दिस सून
 राणी लिछमी भरदानी रो
 गा वहुं भाग निय मायड रो
 रण - बिजें वण्यो घट हानी रो ।५१।
 अन्तस वेळा में घूम माच
 खट - खटाक खड्ग्यां वार कर्या
 सहसां वीरां नें सुला भोम
 मू गा - काबां तरवार भर्या ।५२।
 इतरें में घोडो भोम पड्यो
 बा कूद पडो रण - ज्वाळ बीच
 भळ ज्वाळमुखी री भूमभूम
 वा गई जोत नं सीच - सीच ।५३।
 उण रें गिरतां माची वळवळ
 सूरज बाहिर जिम आभ सून
 दुस्टां पण अत्याचार कर्या
 ऊवळतो हुयग्यो ठंड खून ।५४।

पण लाभ - हाण जै-विजै नहीं
 वीरां रो दिस्तीकोण बणै
 रण फरज ऊतरै जामण रो
 तन तानां - बानां नेम तणै १५५।
 इण कुदरत रो है खेल इसो
 कुण मेट सकै उण अंकां नै
 नर फरज अदा करणं पावै
 तो घिन - विन घण रणवंकां नै १५६।
 भारत भू पर हद करी
 अंगरेजा - घमरोल
 धरम - करम रैं दखल सूं
 कूदण लागा होळ १५७।



धर्म री फेर जगाई जोत

७

लेखणी ! समै - फर नै लै'र
 आथम्यो पूरव दिस रो सेर
 छायायो तमो तोम चहुँ - मेर
 सूर - रवि कुण दीवैला फेर ।१।
 निरासावां रा छाया मेघ
 गैण नै ठवग्यो कुहरो घेर
 दुखणां अत्याचार्यां देख
 कसं किण किसम - कहैया टेर ।२।
 सुणीजै हाहाकारां चौख
 चरचूँ बिछलीजै बित्कार
 निमुण - सम सासक खूब पपाण
 दाव बँठा करणा दित्कार ।३।
 खुल्या कितरी द्रुपदां रा बाल
 भल पुँछग्यो कितरो सिन्दूर
 हुई रीती कितरी मां - गोद
 पापीया सासक अघ सूर् पूर ।४।
 बिछलती वं'नां खोया भ्रात
 बांधसी राखी इव किण हात
 धूरती दुःखां - दधि रो घात
 सूकग्यो पींजर हाड़ा - गात ।५।

घोमणा पिच्छम दिस सूं आय

पावतां अस्वासण रो दूध
घरी विकटरिया सासण डोर

फेर ही रह्या धूत रा धूत ।६।
करी सोसण री घण मनवार

लूटतां लख्या न दानव नीच
हेम - विहगी रा पंख मसोस
तळां विच रोंदी आंख्यां मोच ।७।

खुल्या आयात अनं निरयात

मची कानून मारफत लूट
खायग्या नोंच - नोंच चिकचोड

कर्या फळ - भरिया रुंखा ठूठ ।८।
भणाई मंकाले री नीत

गुलामी - चादर कर विस्तार
नोकरी करणी हुय इक भाव

संस्कृति रो करणी निस्तार ।९।
मनां में दैसत बेठी मूक

नहीं बोलै - चालै मजदूर
मसीनां रै पैंयां पीचीज

दुबळा हुयग्या घण मजदूर ।१०।
मरण लागल छोटा उद्योग

छायगी वेकारी भरपूर
मसीनां सूं टक्कर किण भांत

न लेण सक्ता हुया चकचूर ।११।
खोखळो अरयतंत्र हुय जाय

कठे कुण उण नै सांम कूत
विना नीवां रै ठेंगो भोण

सारथ्यां खोखळ कीनो सूंत ।१२।

घरम रें भावां नें नकभोर

कर्मो संस्कृति माथे परहार
जागीया घरमवीर तज नींद

पुनरजागण करीयो सुखसार ॥१३॥

भूलया जिण आतमगत नीव
वतायो भाव भापरो रूप
कर्मो नवजीवण रो मंचार

दिखायो सपरो पंथ अनूप ॥१४॥

दयानन्द रिसी रें रासां हात
सिखाई सत्य - जीत री बात

वेद घर यज्ञ रूप समझाय
हटाई काळ - अघरड़ी रान ॥१५॥

प्रगटिया परमहंस सतवीर
पढ़ायो प्रेम - भाव रो पाठ

राम घर किसन नांव इक धीर
नरेन्दर अपनायो सच - वाट ॥१६॥

सीखिया सपरां भावां सीख
उघड़गी आख्या फट चरणाट

भावना जळमभोम हितकार
भगवं कायरता बरणाट ॥१७॥

आग रो चिणगारी लघु रूप
सुळगती वालें मोटा ढेर

धुखन्ती धीर - धीरें धुखल
भड़कता कितरी लागे देर ॥१८॥

समं है बाढ़ सरी रो जेम
बहै सगली सृस्टो उण बीव

समं है बड़ो भोम तूफान
करे वड़ डूंगर खेहा कीच ॥१९॥

समैं में चकरावै नर - नार
 समैं मूँ टकरावै कुण जाय
 समैं नै नमस्कार सौ बार
 समैं रो भेद न कोई पाय ।२०।
 समैं पर कोटी है बलिहार
 समैं मूँ मोती निपजै नूर
 समैं नीं करै सीस बगसीस
 चकर में आवैं सो चकचूर ।२१।
 समैं रा गीत गाय बहु सूर
 समैं मूँ फोड़ै कुण निय माथ ।
 समैं जद पलटै पलटो खाय
 छोड़ दै तन रा गाभा साथ ।२२।
 समैं दै उखत कूँत रो सीख
 समैं विण बुध बापड़ कहलाय
 समैं करदैं उलटै नै मूध
 समैं रै कूण लगावैं साथ ।२३।
 समैं री घुर नै जाम कराय
 बणावैं बिर अगद रो पैर
 कळुपियो सामो जोवै कूण
 लै'रणी हक आवैं जळ लै'र ।२४।
 समैं रो गति नै पलट दिराय
 मात रा रण - बाँकड़ला बीर
 घड़ै नव - इतिहासां रा प्रिस्ट
 धर नै कपावैं रण - घोर ।२५।

राष्ट्र-आन्दोलन रो दृढ़ नींव

८

अट्टारै सो सत्तावन रो
 साको वो किम भूल्यो जावै
 जिण ज्वार जाळ जामी जैडो
 चख - मगां उफण लासी छावै ।१।
 विण विणगारी नै समझ बुझी
 नीवींउ हुया सोसणकारी
 पण मांय - मांय सुलगी प्रगटी
 धुव रूप विकट धारणधारी ।२।
 अट्टारै सो तिरियासी में
 कलकत्तौ में पैला पारी
 इण्डीयन एसोसियेसण
 सम्मेलण करीयो सुखकारी ।३।
 सुरेन्द्रनाथजी बैनरजी
 हा नमन जोग नर बांकड़ळा
 आजाद मात मे करण अड़
 खोलण वेड़लळ्यां रा कड़ळा ।४।
 चौरासी रो चक्कर काटण
 जार्ण चौरासी सन आयो
 मदरास महाजन सभा धरप
 भर जोस जवानां मन छांयो ।५।

सगळा भाई हुय अकनिष्ठ

थाप्यो सुभ गठण अंक होयां
सगळां री लगन रंग लावै

अब काम सरै कींकर सोयां ।६।

जद भणियां - गुणियां रै नांवै

चिर पांनो चेतनताकारो

मुख ह्युम सा'व री बात खरी

परकासी कांगरेस वारी ।७।

हुय सम्मेलण भुम्बा नगरी

इक जोस भर्यो आ'वान कर्यो

इक नई चेतना बात नई

नस नव प्रकास जिदगाण भर्यो ।८।

सगळां रै मन हो रोस - जोस

सहु अक सक्षय री रूप हुयां

पण पाण इसी प्राणां पाणी

फू'व.र्यो काळ - सरुन छुयां ।९।

सतवादीजी गोपालकृष्ण

जद बागडोर थामी काठी

घर नरम भाव दृढ़ हिय बीच

कायरता कूच करी नाछी ।१०।

दक्षिण दिसि काळ पड्यो भारी

पूना में महारोग फैल्यो

पण प्लेग भयंकर मू' निपटण

नीं अंगरेजां हिबडो संल्यो ।११।

जद प्रलंकाळ री वेला में

जनता रो ध्यान नहीं

पूना रै रण्ड

बीज नै

नाहर नै गउ समझवाळा

नीं रंगै सियारां नै जांण्या

सिद्धागतां - नियमां नेमां रा

कागद रै पैटां में टांण्या ॥१३॥

वै मिन्नत अरज्यां रै बळ सूं

सासन सुधार जाणी माया

सामाजिक - माळी उल्लावां

मुघ - भावां सुलजाणी चाया ॥१४॥

नीं ध्यान धर्यो सामन कार्यां

घण दमण - चक्र नै तेज कर्यो

प्राकिरतक कोपां री वेळा

दुस्टां मन में नीं हेज धर्यो ॥१५॥

नेता हा नरम भोळाण में

वां मानवता सूं तोल कर्यो

वां मीठी - चुगड़ी बातां में

नाहर कद गउ रै बोल कर्यो ॥१६॥

अट्ठारै सौ सताणूं में

भूकम्प कंपाया हिवडां नै

पण उण पापार्णां काळजियां

ना प्रलै कंपाया जिवडां नै ॥१७॥

कजंत री कूट चाल काळी

तूफान उठायो हृद भारी

टुकड़ा करणै री सुरूयात

आदेस कर्यो अरयाचारी ॥१८॥

बंगाल - विभाजण कूट चाल

कर फूट - फांट जमणो चायो

भाई - भाई नै भिड़ा - भिड़ा

पाप्यां करणो री फळ पायो ॥१९॥

बंगाल धन सहु देस बिचा
 गम्भीर लै'र लै'री म'री
 पग्देमी स्वेच्छाचार्यां पण
 नी लखी कजा गळ में प'री :२०।
 कद दीपसिखा कांपणवाळी
 वा वात - पात - भंभा सेंणी
 वाघावां कस्टां बीच बघें
 डगमगाट कर मारग वेंणो ॥२१॥
 पण तीन केसरी प्रलयंकर
 भट बाल - लाल घर पाल हुया
 थामो उजळी प्रजळी वासी
 वीरां रैं मन घमरोळ छुषा ॥२२॥
 घांधी - बरखा री किम मजाल
 कुण बांध सके तूफानां नै
 जिण कफण बांधियो केसरिया
 धिन - धिन वांनडळें दानां नै ॥२३॥
 ओ बीजो चरण क्रांतिकारी
 ओ उदारवादी पनप सक्या
 जद उग्ररवादी दीवानां
 कद भील मांगणी राह सक्या .२४।
 बलवन्ता वर वै बांकडळा
 बकिम विस - जोर सवाया हा
 वै धाक करन्ता बैलानर
 नाकों घण चणा चवाया हा ॥२५॥
 दां नाक राखियो वीरां रो
 दिन - रात कड़ी मै'नत करणें
 नी डर्या यातनावां सुं नर
 हेंम हांस गया जेलीं भरणे ॥२६॥

है जन्मसिद्ध अधिकार खरो
 सुणलो सुणलो सासनकारी
 भारत रो बच्चो बच्चो भड़
 है - स्वराज्य रो अधिकारी ॥२७॥
 ओ सिघनाद कर धीरां में
 श्री तिलक तिलक अनुपम वणग्या
 पावण आजादी हर कीमत
 बस जोस गर्व सीना तणग्या ॥२८॥
 काळें पांणी रो सजां नहीं
 वरवीर तिलक न डरपायो
 वै आत्मतत्त्व रा जाणकार
 सासन न भटकं जरकायो ॥२९॥
 उत्तर-दक्खिण - पूरव पच्छिम
 महु एक भाव में लीन हुषा
 पंजाब केसरी बोर पूज्य
 मायड़ मुख लख गमगीन हुषा ॥३०॥
 बगाल नहीं पाछें रैंणो
 हर कीमत मोल चुकावै हा
 भूपेन्द्रनाथ - धीरेन्द्र घोस
 , अंग्रेजां खून मुखावै हा ॥३१॥
 लेणै - देणै रैं चक्कर में
 बस ध्यान राखज्यो अक बात
 पैला लेवो अरि प्राण पछै
 अरि माग मरै भिड़ हेक घात ॥३२॥
 सूरत रो फूट सूळकरणी
 पण सोळें सन में भेळ छुयो
 विहुं दळां कर्णवारी रैं बिब
 मायड़ रैं हेतू भेळ हुयो ॥३३॥

सन इग्यारें रो वात खरी

वंग - मेळ हुयो हृद सुखकारी
अधिनेम राजद्रो' कर पारित

ओ सन पण हुयग्यो दुखकारी ॥३४॥

सन तेरें में डाकी सूधा
संसोधन कानूनां करियो

अर राष्ट्रवाद रें भक्तां नें

कुचळण रो भाव मनां भरियो ॥३५॥

सासन करनै नें भरो फूट

अंगरेजां भूंडी चाल चली

अर तीस सितम्बर छत्र सन में

कर थापित लोग न करी भली ॥३६॥

ओ बीज बोइयो ना चोखो

वै भूडो रुद्र रूप करियो

टुकड़ा हुवणै रा भारत रा

भयकारी खून वर भरियो ॥३७॥

सन सतरें रें अधिवेशन में

अथ देव अकसो रूप धर्यो

भज बाल - पाल अर साल भडा

.हुंकार करन्ता जोस भर्यो ॥३८॥

दो हुया टूकड़ा गरम - नरम

पूरण स्वराज्य री मांग करी

इक नई दिसा अर, राग नयो

भिवसा वृत्ति उच टांग धरी ॥३९॥

मिघ रें सामं मिन्नत करियां

कद छोई वो साधू बणने

हिसक नें प्रतिफळ में हिसा

सठ रें सागं सठना भणने ॥४०॥

जद कानूनां रं वळवूत
 काळा कामून करण पाया
 उण रो उयलो ऊचन्तो ही
 घट पापां खूब भरण आया १४१६
 हे देर, नहीं अंधेर उठे
 वळिदानी रंग जमावैला
 जिण सीस अरपियो मायङ्गे
 अरि उण रो घाहू न पावैला १४२०
 प्रतिक्रियावादी नीत्यां सून
 भकभोर दियो हिवडो पाप्यां
 जद पत्यर रं भांडार बिचां
 सख नरसंग रूप कडो कांप्यां १४३१
 वो रूप सुलपणो प्रलयंकर
 ताण्डवकारी अत जोस मर्यो
 खट खटाक करतो भणण भणण
 आजाद हुवण नै रोम कर्यो १४४१
 श्री विपिनचन्द्रजी नाद कर्यो
 हूं मोख मांगणी नीं चाळं
 दै दान अगर आजादी रो
 नी दान मांग लेण पाळं १४५१
 जद वेण कह्या इम लालाजी
 पंजाब - केसरी खरा - खरां
 विरती-धिरणा इण भिक्सा सून
 आजादो खातर मार मरां १४६१
 हे राज फिरंगी पमुता रो
 पमुता - बळ सून लडियो जावै
 कृण समझावै निध ठोठां नै
 भीतां सून बहस करी चावै १४७१

जद कानूनां रै वळवूत
 काळा कामून करण पाया
 उण रो उयळो ऊचन्तो ही
 घट पापां खूब भरण आया ॥४१॥
 हे देर, नहीं अवेर उठे
 वळिदानी रंग जमावेला
 जिण सीस अरपियो मांयङ्गे
 अरि उण रो थाह न पावेला ॥४२॥
 प्रतिकिरियावादी नीत्यां सून
 भकभोर दियो हिवडो पाप्यां
 जद पत्यर रै भांडार बिचां
 लख नरसंग रूप कडो कांप्यां ॥४३॥
 वो रूप सुलपणो प्रलयंकर
 ताण्डवकारी अत जोस भर्यो
 खट खटाक करतो भणण भणण
 आजाद हुवण नै रोस कर्यो ॥४४॥
 श्री विपिनचन्द्रजी नाद कर्यो
 हूं भोव मांगणी नीं चाळ
 दे दान अगर आजादी रो
 नी दान मांग लेण पाळ ॥४५॥
 जद वैण कहा इम लालाजी
 पंजाब - केसरी खरा - खरा
 विरती-घिरणा इण भिवसा सून
 आजादी खातर मार मरां ॥४६॥
 हे राज फिरगी पसुता रो
 पसुता - वळ सून लडियो जावे
 कुण समझावे निध ठोठां नै
 भीतां सून बहस करी चावे ॥४७॥

सन इग्यारें री वात खरी
 वेंग - मेळ हुयो हद मुखकारी
 अधिनेम 'राजद्रो' कर पारित
 ओ सन ११ हुयग्यो दुखकारी ॥३४॥
 सन तेरें में डाकी सूघा
 संसोधन कानूनां करियो
 अर राष्ट्रवाद रें भक्तां नें
 कुचळण री भाव मनां भरियो ॥३५॥
 सासन करनै नें भरो फूट
 अंगरेजां भूंडी चाल चली
 अर तीस सितम्बर छव सन में
 कर थापित लोग न करी भली ॥३६॥
 ओ बीज बोइयो ना चोखो
 वें भूटो रुद्र रूप करियो
 टुकड़ा हुवर्ण रा भारत रा
 भयकारी खून वीर भरियो ॥३७॥
 सन सतरें रें अधिवेशन में
 त्रय देव अकसो रूप धर्यो
 भज बाल - पाल अर लाल भडा
 हुंकार करन्ता जोस भर्यो ॥३८॥
 दो हुया टूकड़ा गरम - नरम
 पूरण स्वराज्य री मांग करी
 इक नई दिसा अर, राग नयो
 भिक्षा वृत्ति उच टांग घरी ॥३९॥
 सिध रें सामें मिन्नत करियां
 कद छोई वो साधू बणन
 हिसक नें प्रतिफल में हिसा
 सठ रें सागे सठता भणनै ॥४०॥

जद कानूनां रें वळवूतें
काळा कामून करण पाषा
उण रो उयळो ऊचन्तो ही
घट पापां खूब भरण आया १४१।
है देर, नहीं अंधेर उठें
वळिदानी रंग जमावैला
जिण सीस अरपियो भायड नें
अरि उण री थाह न पावैला १४२।
प्रतिकिरियावादी नीत्यां सूं
भरुभोर दियो हिवडो पाप्यां
जद पत्यर रें भांडार बिचां
लख नरसंग रूप कडो कांप्यां १४३।
वो रूप सुलपणो प्रलयंकर
ताण्डवकारी अत जोस भर्यो
खट खटाक करतो भणण भणण
आजाद हुवण नें रोस कर्यो १४४।
श्री विपिनचन्द्रजी नाद कर्यो
हूं भोख मांगणी नीं चाळें
दै दान अगर आजादी रो
नी दान मांग लेण पाळें १४५।
जद वेंण कह्या इम लालाजी
पंजाव - केसरी खरा - खरा
विरती-घिरणा इण भिवसा सूं
आजादी खातर मार मरां १४६।
है राज फिरंगी पमुता रो
पमुता - वळ सूं लडियो जावें
कुण समझावें निध ठोठां नें
भीतां सूं बहस करी चावें १४७।

सावरकर - बन्धू वीर घणा

नी डरणवाळा हा जम सूं
करणी - कवणी में नीं अन्तर

सट भिडणवाळा हा बम सूं १४८।
कर सगती गठण आत्म निरभर

सह कष्ट नही घवरावांला
सहु त्याग कर्त्यां सुख-धन-वैभव

सपरी आजादी पावांला १४९।
कर बहीसकार परदेस्यां रो

सामान पारको नी वरदा
नी करां नोकरी सासन रो

नीं डरां मातृ - सेवा करता १५०।
पण नरम - उग्र दळ बेहूं ही

भल हिवडूं अक नेम धरियो
बेहूं अपरित हा मायड पै
सगळां मन देस प्रम भरियो १५१।



मरणै जलियांवाली बाग

६

सहोदां री सूघो इतिहास
 कहीजै कलम काठ री केम
 सुण्या जिण नांव सुलपणो सूर
 सीचनै रगत निभावे नेम ।१।
 नीपजै समै बोइया नूर
 अड़ोके कदै न लैरां टेम
 समै पर बलिहारी हुय जाय
 मात री चावे कुसळां - खेम ।२।
 आग री लपटां घर अंगार
 साप सह उजळै अघको हेम
 हयोड़ा अर घण सूं धिर होय
 घड़ाघड़ भेनै चोट्यां जेम ।३।
 धूँकणो धूँ - धूँ धूँवाधार
 सिखावे पूण बहानै सीख
 सह्या दुःखां जस घबळ सवाय
 चिरै हिय कदै न काढ़ै चीख ।४।
 रहै उण बाग चमन हर रोज
 गन्धर्व मघरो गम गैमाय
 भेवर नित जसां प्रमारै भोम
 उणां नीं काळ कळुपियो खाय ।५।

नहीं बिर माया - काया जगत

बात आ घारी विस्वा वीस
कफण केसरिया माथे सोय

पिसुणियां खूब पछाड़ै पीस ।६।
हुवै नीं कदै किणी रा दास

मनां रा मौजी सिंघ लंकाळ
मस्त जीवण मस्तानो माण

देखनं डरै उणां सूं काळ ।७।
उणां रै पावां लंगर - लाज

'गुलामी' सबद उणां नं गाळ
करै वगसीस सीस भल काज

उमापति रं गळ सावै माळ ।८।
कूड़ कानूनां रो जंजाळ

माग नं रोक सकै किण भांत
जोगिया जळमभोम रा जीव

दिखावै कायर जिम नीं दांत ।९।
सन उन्नीस गुणीस कुलखणो

तिरीदस दिवस मास अपरेलः
'रोलट एक्ट' विरोध जतावण

भोड़ ऊमटी रेलम - पेल ।१०।
सगळां रै मन रास मोकळो

होम - हुतासण साथ लियां
बांकां अगन पाग -मे बांध्यां

रुद्र रूप हुय नाच कियां ।११।
मनां में उण सहु भरग्यो रोस

ऊफणै बांळै तोडी सीव
बांध केसरिया भावड़ माथ

रूप घर पांडव - अरजन - भींव ।१२।

'बाग जलियांवाळां' रो गाथ
 लिखन्ता काळजियो हुय टूक
 काळिमा रो लख भूँडो रूप
 हिये में सूख उठावे हूक ११३।
 बूढा - बच्चा मरद - लुगायां
 भीड़ नदी रो बे'ती आई
 कुण नै ठा ही क्रूर काळ रो
 खाखी बरदयां चहुँ दिस छाई ११४।
 छूटा घोड़ा दनदन करता
 सुडताळां तरवारां तई
 गोळां - गोळ्यां बीछारां रो
 लुसियां माये मातम छाई ११५।
 ताळा लाग्या जद जुवान पर
 नीदो नै भट नीद दिराई
 आखें - देख्या हाल कथण कूँ
 वजंजर ही निय हियो चिराई ११६।
 उडायर गी ऊंधी आग्या
 गोळ्यां रो बीछार कराई
 च्याहूँ मेर घेर जनता नै
 रगत - पूगणी नीब भराई ११७।
 कितरी चिल्लाहट हा ! सुणने
 जळियांवाळो बाग विलखियो
 ऊगड हुयग्यो भीड़ - भाड़ रो
 जुलस मसाणां चमक चिलकियो ११८।
 बळ्यां भाड़दी कितरी पाप्यां
 नी देख्यो मधुमास बिचारां
 ऊगण सूँ पैला ही उणें नै
 चुण - चुण नीवां भेरी चिजारां ११९।

सौरभ फैलण सूं पैलां हो
 मसळ - मसळ भू माथ गिराई
 नहीं देखियो जीवण - जोवन
 लण नै दुस्टां कजा दिराई ॥२०॥
 सतवन्ती बं'नां रै सिर सूं
 कितरी वमुघा पाट कराई
 लोटपोट कितरो मातावां
 खाई खाली खून भराई ॥२१॥
 बूढ़ा जरजर जळमभोम पर
 प्राण अरप निय फरज निभायो
 भुर्यावाळं चं'रां उजळ्यो
 भरहुम जिवड़ां जोव जियायो ॥२२॥
 भल सिन्दूरा री ठीड़ भरण
 नव दुरगावां में जोस भरयो
 निय तन सिरि गोळो - बीछारा
 हँस - हाँस ऊजळो रगत मर्यो ॥२३॥
 चीख वै काळजियं नै चीर
 घाव करग्या जनता भरपूर
 खोलग्या हिवड़ं नै भरुभोर
 करी मानवता चकनावूर ॥२४॥
 मारदी विहगो पाँख मरोड़
 देखता रै'ग्या सगळा घूर
 बाज जिम अक भपट्टो वोड़
 बिछलतां बचिया बिछल्पा भूर ॥२५॥
 निसाणां अणगिण मार्या नीच
 जिणां पापाण छेरुळा कोन
 घणा ही घोड़ां रो घमरोळ
 ताक पर मेल्यो निय रो दीन ॥२६॥

किया घण बेहद-अत्याचार
 धार ; जातूधानी सामाव
 मात कर असुरां री करतूत
 हुया दुस्टां रै मन हड़काव ।२७।
 भूलग्या सगळा सूघ विचार
 छोड़नै मानवता री रीत
 मसीनां घड़घड़ गोळ्यां मार
 नही उण पाप्या मानो चीत ।२८।
 देय घेरो फौजी दीवार
 मसळशी मानवता मक्कार
 अरे ! बां राक्षस - असुरा - डार
 फिटफिट काळुपियां चिक्कार ।२९।
 वसन्ती बळती हुयभी वाय
 घघकती आंधी अर तूफान
 मं'कती मीजर तर सहकार
 दं'कती अनल मांडियो गान ।३०।
 सहीदां पत्रभड़ सामे देख
 पड्या भूकरणं घण प्रतिकार
 सोयनै फूला जिम सुख सैज
 जगाई जोतां कर फुत्कार ।३१।
 हुगो घड़घड़ाट रो सुर तेज
 फाटिया खवणपुटा रा पाट
 बही घारा सोणित री अम
 पाटिया बिहूँ सरिता रा घाट ।३२।
 कोकिला बीसरगी कळ-कूक
 कण्ठ बूठीज्या कंवळी गार
 भँवर री मधरी - सी हिय कूक
 भरम में काटीजी-भ्रू धार ।३३।

रंग उड़ग्यो फीकें मधुमास
 पीत रंग हुयग्यो चटपट लाल
 जावतें पतझड़ पत्ता झाड़
 झूठ रूखा री वाळी खाल ॥३४॥
 जगाई होळी री भल भाळ
 उठन्ती लपटां भरियो जोस
 जलाई मनड़ा इसही चाल
 गढ़न्तो बलिपथिकां री कोस ॥३५॥
 सड़ायर री पापी करतूत
 कराई घड़ाघाड़ सड़ताड़
 हुकम दे हुकमत भरिये भूत
 मचाई बड़बड़ाट घड़घाड़ ॥३६॥
 निसाणां जाण सिकारां मार
 दनादन गोळ्यां री घमरोळ
 मिनख पर इम घमुरी व्यवहार
 खनाखन करता सायर टोळ ॥३७॥
 सोयग्या सान्त भाव सूं सूर
 ठठाका मार ठगां कर ठीक
 नोपज्या मायढ़ पूत सपूत
 टीकग्या राज फिरगी टीक ॥३८॥
 ह्या हक्कावक्का नर - नार
 सोच नीं सक्का दुष्टनी चाल
 लखी च्यारूं बांनी घड़घाड़
 खीचसी जाण जीवित खाल ॥३९॥
 बे'या रतनाळा खाळ - प्रवाळ
 हुयो कीचड़ हा दो जळियान
 निहय्या लोणां री ले जान
 नही जू रंगी हुकमत कान ॥४०॥

सहीदां रो रत भरणी जाम
 देस में उमट्यो इम तूफान
 सुळगती चिनगार्यां रो कोस
 गाइयो वीरां सीधू - गान १४११
 बलिआथिकावां रो बलिदान
 हमेसा मुणियो फळयुत होत
 फूटसी पापां मूं घट पूर
 करे चाझे सगळा मिल कोत १४२१
 सहस्रों हाथ सहस्रयुन सेन
 सामनें ऊभो डायण जेम
 बाधनें पिजड़े में लकाळ
 चलै बस कितरो कितरो किम १४३१
 देयनें सस्त्र वोर रं साथ
 देखता उण भीमां रो जोर
 निहृथ्या घर बघिया वं हाथ
 कियो असुरां अघ भिल्लनं घोर १४४१
 रूप हिंसा रो इसो कुरूप
 फलम मूं केम बखाण्यो जाम
 गोर - रंग रंग - रंग काळो रूप
 कोपलो काळो हिवडो काय १४५१
 याद जद काळो घटना आय
 करे भंकृत विद्युत सहू काय
 क्रोध तन व्याप डील नै खाय
 जोस मस - नस में छावै छाया १४६१
 दिवस ओ कींकर भूल्यो जाय
 उवाळै ठंडै पडियै खून
 याद कर जळियांवाळो वाग
 खून नस - नस उफणै रत - दून १४७१

नमन उण जाण अनं अणप्राण
 सहीदां मायड़ - भू रा साल
 रहिर रो कतरो - कतरो प्राण
 निभासी उण भगतां रो चाल १४८।
 वीर रो भण्य - भण्य बलिदान
 मात रो करै सवायो नूर
 नमन बां सूरानं नै सो वार
 सदा दै संवळ सदबुध सूर १४९।



जोस जद हुयग्यो उजली आग

१०

आवादी रो इतिहास अच्छे
 मणि अक्रेक अक्रेक सूं दोपंकर
 आ माळा माळ इसो ओपं
 अर विजंमाल है जीतंकर ।१।
 कथ घोर सहीदां रो का'णी
 घण उथळ - पुथळ रो परवानो
 जिणने संजोयो खूब सबै
 ओ कनक - रगत रो शुभ पामो ।२।
 सन उन्नीसें रो कळळ - भळळ
 हिवड़ां में हूक उठावै ही
 काळजियै रा कर टूक - टूक
 आसा पण घोर बढावै ही ।३।
 पण बीस आयग्यो सन डाकी
 खाया उगगरवादी खारा
 श्री बालतिलकजी' ऊजाळा
 हुयगा वै नंणां रा तारा ।४।
 बां सूरज सूर सिवा सम बण
 उथळा करग्या वै सागीड़ा
 किम सूरज - जोती होड़ करै
 बंधण तोड़्या जिण बाधोड़ा ।५।

वां राह दिखाई सगती रो
 सगती विण मिव री पूछ हटें
 सगती विण रीतो सब सिव है
 सगती है तो कट - काट बटें ।६।
 सगती री पूछ हुव सगली
 सगती विण नर नो मोल कठें
 सगती जीवण री नांव धवर
 सगती विण सामें बोल नटें ।७।
 सगती रें भागें जगती सह
 हाफें सरणां भट हुय जावें
 सगतीसाली रें चरणां सट
 लिछमी ही घणी रेंण चावें ।८।
 सगती भालां - तरवारों री
 सगती बन्दूकां री भारी
 गोळां - बारूदां सगती घग
 सगती री मै'मा हद सारो ।९।
 सगती भासण अर बोलण में
 सगती जगती री सार - तत्त्व
 सगती री लीला कण - कण में
 सगती नोसरिया जाय सत्त्व ।१०।
 सगती सूं कुण मायो फोड़ें
 सगती आदर करवाणी है
 सगती सूं वर नही करणो
 आ ही दानां री वाणी हैं ।११।
 सगती आराणां में सोवें
 सगती री लीला है न्यारी
 वा रण - चण्डी प्रलयकारी
 उण नै है मारकाट प्यारो ।१२।

पण भारत री आजादी - पथ
 सगती री दीठो रूप जवर
 बुध - महावीर री सगती री
 वो रूप अहिंसा हुयो वजर ॥१३॥
 च्चारुं कानो यरजण गं'रो
 ही कड़कड़ाट पाळी फंसी
 आंनं में चपला चकाचौंन
 खिसखिलाट करणो ही गं'ली ॥१४॥
 भारत में तानासाही ही
 दोलो पर ताळा लाग्या हा
 आरन विण आंभी री तरणी
 खोजी तूफाना बाग्या हा ॥१५॥
 कुण धाम्भेला पतवार कड़ी
 डगमगाट करती नैया री
 वा डगू - डगू मझघार पड़ी
 गमगमाट करती मंया री ॥१६॥
 आंसूड़ा पूछेला इब कुण
 कुण बेइलत्यां नै काट करे ?
 सपरी आजादी रे खानर
 कांटां में सूधी वाट करे ॥१७॥
 कुण साहो - सींगा नै बांधे
 कुण म्याळ रे भुख जावना
 कुण जिन्वगाणी रो मोह तज्यां
 भौतिक सुख तजणै पावला ॥१८॥
 कुण बांध बूधरा : पांघा में
 भोपा बण जेर उतारला
 कुण बणे गोड़ियो काळवेळ
 सगळां रा कारज सारळा ॥१९॥

उण काळ हिमांसू री उमळी
 च्याहूँ दिस परमासी जोती
 वा मनमोहन री मोहक छिन्न
 चारूँ उण पै होरा - मोती ॥२०॥
 गांधीजी घारी वागडोर
 चहुँ ओर निरासावां गैरी
 ही समी निसा वादल छाई
 काटां री वां माळा पैरी ॥२१॥
 गांधीजी घाम्मी डोर हाथ
 कबळा हाथां नै कर कठोर
 वॅरिस्ट्री छोड़ी देस - काज
 सोई सगती नै कर बटोर ॥२२॥
 भण वॅरिस्ट्री बोलायत सून
 वें खुसी - खुमी भारत आया
 अट्टारिं सो ईकाणूँ में
 वें सैर सैरका मन साया ॥२३॥
 तद दाय वरस रं अन्तर मे
 सन तेराणूँ नूतो लाया
 अरु अफीका में अेक वरस
 करणा मंनत उत्साह्यायो ॥२४॥
 पर उठै पैरवी बीजी हो
 वो रूप कुलक्षणो सामे हो
 मोरें सासन रो दमन - चक्र
 जानै ऊमो आराणै हो ॥२५॥
 भारतवास्यां नै काळा गिण
 अणगिणत जुलम जुल्मी करिया
 गांधीजी घार्यो सस्त्र नही
 सत्याग्रह सून कारज सरिया ॥२६॥

बा बीस बरस री अवधी ही
 अफरीका में लाम्बी छाई
 जद हिंसा छोड़ अहिंसा रें बळ
 'निश्चय सूं प्रगति पथ जाई ॥२७॥
 विन बेराग त्याग ना टिकणो
 साध्य जिसो ही साधन सोवें
 गांधी जी रो अमर सत्य गुर
 झूठं मुख कुण जीवण खोवें ॥२८॥
 चवदै सन में अफरीका सज
 कीरत फैली भारत आयी
 जुद्ध लड़ण नै अजादी रो
 पूत प्रथम वा सिक्का पायी ॥२९॥
 पनरै सन में अत दुखदायी
 मोचु गोखलेंजी जद पाई
 काळ - कळुपियै री करतूतं
 'हिवई नै टुक - टुक कराई ॥३०॥
 बीजा नेता फिरोज'साजी
 सरग सिधायी पनरै सन में
 पाई बहूँ दिव्य अमरता
 उण री मूरत गदरै मन में ॥३१॥
 अफरीका रें बाद मा'तमा : :
 चम्पारण - आराण जीत्रियो
 दुखी दसा कृसकां भायां री
 तिनकठियो कानून बीतियो ॥३२॥
 अस्त हुयो निलहां री सासन
 रेंयत निय री ताकत जाणो
 वहम दूर हुयग्यो ओ बां री
 सफल हुई गांधी री वाणी ॥३३॥

फेर द्वैध सासन-करणै रो

मौटफोर्ड कानून गाजियो

रोलट एक्ट रोम भर दीनो

न्याय - भाव तत्काल भाजियो ॥३४॥

पंडित मोतीलाल गाजिया

तीनू वातां बन्दी हुयगो

बकील-अपील-दलीलां - रस्तो

बन्द हुयां न्यायालै सुयगो ॥३५॥

अळियावाळां बाग कांड वै

मानवता मै काळी पोती

हिये माचग्यो सगळां कळभळ

दानवता वा प्रगटो कोतो ॥३६॥

चैटरजी वंकिमचन्दरजी

खोल्या जिण भावां रा बारा

गीत पून पावन रच जग में

आदर करै सोस भुक सारा ॥३७॥

‘बन्दे मातरम्’ गीत सुलपणो

जिण अनुपम अकित भाव भर्या है -

आजादी री बळिवेदी पर

स्वाहा - स्वाहा वेण भ्रूया है ॥३८॥

आ तान तरग्यां सूं उमटी

मूरदां मे संचरै रस फुहार

सख अर्पित पुत्रां रो जीवन

स्वोकार करै मां सुत - जुहार ॥३९॥

इण आजादी री जोतां में

गुरुदेव जोत जगमग करणो

साहित्य - सृजन रै भावा में

जिण प्रेम भर्यो मायड़ घरणी ॥४०॥

वां जळियांवाळो कांड मुमर
 'नाइट' आभूषण त्याग कर्‍यो
 विद्रोह मर्च्यो मन सान्ति रं
 चन्दन रं रुखां भाग भर्‍यो १४१।
 वां बंग - भंग आन्दोलण में
 सगळां सागं सट भाग लियो
 कजन री भूंडी चालां नै
 उथळो देवणियो नाग हियो १४२।
 तिलक महोदय रं प्रमाण सूं
 अणपूरित गति सामै आई
 छोड़ गया बिलबिलात करता
 नहीं दया वै कजा दिखाई १४३।
 गांधीजी रं हठ कांघां पर
 आयो सारो बोझो भारी
 तंडै पण सकटां पार करै
 हिम्मत रो किम्मत है सारी १४४।
 बीस दिवस सन बीस बरस रो
 कर बहिस्कार परदेसी रो
 अण - सहयोग रो संखनाद
 हो भगडो देम - विदेसी रो १४५।
 जय बोल सहू हिन्दू - मुसलिम
 ने'रुजी भाखी आ वाणी
 हो कारण साफ खिलाफत रो
 अंग्रेजेजां नी इसड़ी जाणी १४६।
 बल राजकुमार फिरंगी रा
 कर बहिस्कार पूरो विघ सूं
 सन इक्किस् में भारत आया
 दीख्या लच्छण इकरंगी सूं १४७।

हो जोर सोर रो आन्दोलण

सान्ति सूं चाल रह्यो नीको

पण पांच फरवरी वाइसै

चौरा - चोरो लागो टीको १४८।

इक्कीस सिपाही हुया भस्म

इक बाणैदार हुयो स्वाहा

गांधीजी रो हिवडो कांप्यो

हद च्यांरूं मेर हुयो हा - हा १४९।

जद सात दिनां रै बाद जबर

बारै फरवरी नै रोक करी

आन्दोलण हुयग्यो ठण्ड - टीप

पण खूब खिसाफत लोक भरी १५०।

सरकार अपडिया गांधी नै

वो चार मार्च रो वाको हो

अर सजा दिराई छव - वरसी

वो वज्जर रो वर साको हो १५१।

पण स्वार्थ बिगड़तो देखपरो

दो वरस बाद छोड्या पाछा

आन्दोलण हुयग्यो खतम और

हिन्दू - मुसलिम भोड्या माचा १५२।

सट जिलमी हिन्दू - महासभा

भळ भाजादो नै पावण नै

ही अक दोठ उण समै सदा

खळ - खळां दूपणां खावण नै १५३।

सी आर दास विठ्ठल भाई

श्री मोतीलाल अक हुयग्या

ढट नीव स्वराज्य पारटी रो

उन्निस सी तेइस सन छुयग्या १५४।

इक धार गंग री घुर पवीत
 निसरी घवळागिर सूं गै'री
 भारत रो रूप मुलपणो हो
 अम्रित अन्न घारा लै'री ॥५५॥
 नेतावां रै हिय हर निपजो
 आज्ञाद मात करणै खातर
 वस बलिबेदो री साकल घण
 इह निश्चै निव भरणै मातर ॥५६॥
 पट हियै हिमाल उचल - पुचल
 माँची साँची मायइ भगती
 गौरव भारत रो सुमर - सुमर
 जग बाग जगा जायइ सकती ॥५७॥
 आज्ञाद हुवै भारत जननी
 ऊजल गौरव घण ऊजाल
 जामण रा सगळा जायन्दा
 सहुभाव - बळुपियां नै वाल ॥५८॥
 काठी घेइयां काटण खातर
 वीरत्व रूप सामै आयो
 इण जेत ऊजळी परगासण
 ध्वज मुवत गगन में - लै'रायो ॥५९॥
 वस श्रेक लगन ही रात - दिवस
 रै'व अखण्ड भारत म्हाँरो
 भाई - भाई रो भाव भरां
 नां वाघां पापां सिर भारो ॥६०॥
 जिण श्रेक भोम पर जिलम लियो
 इण माटी - भावां बोरीज्यां
 इण मे पाळित - पोषित हुयन
 अब कठै न जावां टोरीज्यां ॥६१॥

जय संसनाद री तेज चमक
आन्तरिक नेह रो मन चार्घ्या
भारत रें'सो नित सण्ड-रहित
साकळ प्राणां री वर चार्घ्या ।६२।
वै वज्र बण्यां हा वांकडळा
फोलादो वपु चमचम करतां
वै फुन्तां अर तरवारां नै
भल रूप अहिंसा सून भरता ।६३।
सन उन्निस सौ अठ्ठाइस में
साईमन घणो विरोध हुयो
'साईमन पूठा चढ़ जायो'
चट जनता रें मन क्रोध चुयो ।६४।
लाठी रा वार घड़ाघड़ सह
लालाजी सुरग सिधायो हा
गोविन्दवल्लभजी ने'रुजी
लाठ्यां अर डंडा खायो हा ।६५।
सहू देस माचगी हूंक कळळ
हड़ताळा जोर माचियो हा
लालाजी भारक अफसरिये
भड़ताळा सोर ताचियो हा ।६६।
हिन्दू - मुस्लिम इक पीधें रा
वै सुमन सुलपणा थातो हा
दोनां री रगत रंग लायो
भाई - भाई बिहुं साथी हा ।६७।
इक खून खोळगो दोनां में
भारत री आजादी खातर
बेहू रो भारत माता है
वळिय रा अं सपरा पातर ।६८।

है हाड - मांस भर रगत अंक.

अंकी 'पोयो पड़िया. योधा
अंकी जाग्या फूल्या - फळिया'

अंकी घरती रा अं पीया ॥६६॥
सन सत्ताइस में हाय ! भणूँ

किम विस्मिल वीर कहाणी नूँ
अमफाक-लाहिडी - रोसन नम'

'झड़ अशियां नोर बहाणी सूँ ॥७०॥
मायड़ रा लाल सपूत खरा

फासी रै तहत वै भूल्या-
जिण फूला रै सीतां यूथी।

'माळा अरपित कर सै फूल्या' ॥७१॥
किम त्याग सहोदां रो भूलां

वै अखिल्यां रा तारा है
'प्राजाद' - 'गुरू' वै भूलां किम

बै निरमल गंगा - धारा है ॥७२॥
वै जंत प्रकास्यो जोस इसो

टयसर सासन सूँ लेणै रो
वै जगमग करती जंतां सूँ

हो- इसणो जाणै पणै रो ॥७३॥
जद क्रान्तिकारियां जोस बढ्यो.

व भाग उगळता सोला हा-
वै ठोस ठोस बस ठोस वीर

खुद बण्या बम्ब रा गोळा हा ॥७४॥
वां करण धमाकी चाह करी.

दो वीर सामने आया हा-
पंजाब केसरी भगतसीव.

बटुकेस्वर सिधणी जाया हा ॥७५॥

वै वीर असैम्बली भोन - पूंच

भट इंकलाव रो गाज करो
दो बम्ब फैंकिया दणदणाट

सगळां री सुघ-बुघ नाज मरो ॥७६॥

खल्लबळाट माच्यो भोन बीज

सगळां रा देव कूंच करिया

पण वीर हुया धिर जांगां पर

मरणा मौकें किण सूं डरिया ॥७७॥

कद वीर डरै कस्टां - कुत्तां

बै कस्ट - कण्टकां सुमन भरै

भट भटक चक्रमो' माया रा

उण सूं मायङ्ग रा काज सरै ॥७८॥

नीं भुखणा कदै कूड घागै

दुड पथ सूं नीं डिगणैवाळा

कर अंक वार निहचै मारग

नीं कदम पाछ घरणैवाळा ॥७९॥

जद न्यायाल' में केस गयो

साजिस रो जाळ जुलमकारी

सरकारी पक्स गवा' भूठा

फांसी रो रगड़ो कर भारी ॥८०॥

हो जुलम नही बां रो कोई

बस आजादी रो माग करो

मानव पर मानव रो बन्धन

सोसण काटण री डांग घरी ॥८१॥

माता नै दुखी देख मनङ्गो

बैटे रो नही सान्त रै'वै

तन - मन रो मो'छोड़ जल्दी

धमन्यां में तपत रुहिर बै'वै ॥८२॥

नाहर सम हिन्द केसरी ने
 जद बीच कटघर ऊभायो
 तणग्या आंखइत्यां रा होळा
 सासन ने भटके सुगायो ।८३।
 जद मुलजम धण्या भगतसिधजो
 हुय निडर सामने आया हा
 मायहु रो माण करणखातर
 वं सांचा सिधणी जाया हा ।८४।
 धिदू अभिभासक सरकारी जद
 चोगाधारी साम आयो
 जद जुरम बतायो मुलजम रो
 कमरे में सगनाटो छाया ।८५।
 कस देसद्रोह रो बात कही
 पूरी गाथा कंणी चाही
 झूठी दलियो कथण चीख्यो
 वा मिसल बणो पोखी साही ।८६।
 वस देसद्रोह रो बात मुणो
 व सिध करी हुकार कही
 कर अट्टहाम हंस - हंस जोरो
 जाण ही उण ने खुसी वड़ी ।८७।
 व लगा ठहाका जोरा सू
 ठट्टा जाण करणी ठाणी
 कुण रो हिम्मत ही रोक सकी
 भट्टा हा दुरगम चट्टाणी ।८८।
 अर अरज करी न्यायालैन
 सरकारी दुस्ट पकसधारी
 ऊवें स्वर सू निय बात कही
 दानवता रूपी नक्कारी ।८९।

फूहड़ री भाँत हँसी - हँस नै
 अपमान करे न्यायालै'री
 मच माणहाण कर कोरट री
 अपराधी दरज - आलै रो ॥६०॥
 हँ अरज करूँ इण कारण सून
 ओ भुलजम खतरनाक भारी
 इण देसद्रोह रै अभियोगी
 तोड़ी मरजादा - हृद सारी ॥६१॥
 पण फेर हँसी सून रोबीलै
 ऊतर दीनो इचरजकारी
 हँसतै - हँसतै ही दे उथळो
 जाणै कीनी फट बमबारी ॥६२॥
 हँ हँसूँ हँसूँला हर बेळां
 हँ जीवन भर हँसतो रै'सून
 हूँ फाँसी चढ़नां भी हँससून
 धूँ सजा दिरासी जद कैमून ॥६३॥
 तद किसी अदालत आवँला
 फरियाद करैला किण विष सून
 हूँ चूँमूला जद फन्दे नै
 हूँ हँसी हँसूँला इण विष सून ॥६४॥
 हूँ लाड़कुँवर हूँ जायइ रो
 मायइ रो फरज उताहँला
 थाँ रै इण कूड़-कपट आगै
 नी अपणो सीस भुखाऊँचा ॥६५॥
 सुण अमर वंण मस्ताने रा
 सगळां री बुध चकराई हो
 हवका - वक्का सक्का हुयग्या
 सासन री घिड़ मकराई ही ॥६६॥

वो मट्टहास कर फेर हँस्यो
 तांडव - नर्तक ज्यों गर्वगार
 जाणें हो आग लपरको वो
 मद भार फिरंगी सर्वमार १६७।
 घासर रच होंग मूकदम रो
 बां नै फांसी गर नटकाया
 यट्केशवर पाछें उम्रकंद
 गुरुदत्तजी ऊार अटकाया १६८।
 हो मिट्टी हृद वा फौलादो
 चापेकर - वन्धू बणया बजर
 फांसी रै फंदै हेत फर्यो
 सगलां भायां री अँरुनजर १६९।
 श्री वामुदेव चापेकरजी
 फांसी - तरुतें द्विग जावें हा
 अलवेलो चाल खुसी भारी
 जाणें जीवन - सत पावें हा १७०।
 बां जल काटतां भाई नै
 अलविदा करी खडा सागें
 अर काळगोटड़ी धुन उमटी
 जाण गुड्डी चढ़गी थागें १७१।
 ही बालकृष्ण जी री गजेंन
 हाँ ठाठ - बाट सूँ गमन करो
 हूँ ही दो दिन में आऊँगा
 भास्तमाता नै नमन करो १७२।
 गूँजी आ कारा में गजेंन
 पाछें हो संखनाद पावन
 रण बीजमंत्र आजादी री
 या गीता री सपरो गावन १७३।

श्री बासुदेवजी की सादर
ऊजळ जस सागै संग कर्यो
चापेकर - कुळ री दमक चमक
मल बळिवेदी पर रंग भर्यो ११०४।



सीख श्रद्धानन्दजी री साख

११

पढ़ोजे इतिहासां रा प्रिस्ट
रगत री स्याहो देवं साख
सहीदां रो सपरो सहकार
रक्षण ऊँची भारत रो पाग ।१।
जिणां री सा'दत जव्वर - जंग
सुखायो अंगरेजां रो खून
भांक वा खे - खं करणी भूँब
बाजती बाळै पानां - पून ।२।
नमूँ उण वज्जर रोड़ा - नीव
घणी सह घुमरां री घमरोळ
होम निय तन - मन सगळो सींच
कुदाया पाप्यां रा घण होळ ।३।
सदा हो सगळो बातां सूघ
नहीं हा. अन्यावां री माग
खरी - सच सिन्धू रागणी कूँत
जगाया सूता नाहर जाग ।४।
जुद्ध में जूझारां भट जूँभ
भटकिया भटकै सुँ जंजाळ
तोड़ने ताळा तोमतडाक
जळाई जोत जाळने जाळ ।५।

सहीदां री माळा सोकार
 अक सू अक धमकणो नूर
 सीस री सीदो करणा सूर
 गूँज गुंजित कर गणा पूर ।६।
 इमा जूझारां रा सिरमौर
 हुया थो अद्धानन्द मार'राज
 जगाई ज्वाळां पळपळ जोत
 लपरको लगा फिरगी राज ।७।
 करा मानवता री प्रतिबोध
 तोडने असत रुढ़ियां बन्ध
 मार अग्यान - अविद्या - माल
 जोडने सत्य - न्याव मंन्ध ।८।
 पिता री नानकनन्द जी नांव
 रैवना जालंधर रै पास
 लागतै फागण मइने लाल
 जिलमिया तेरस मितो खास ।९।
 गाइजै तळवन साँचो गाँव
 हुयो वो इण नामै विख्यात
 जिलम री गण बिहु चंद गुणीम
 बृहस्पती मुंमीराम : ख्यात ।१०।
 गिरीजी दयानन्द गी सीख
 पळटियो उण री जीवण - भाग
 हिये में सदा सुमन हृषाय
 सूख हुय फूँफाड्योडो नाग ।११।
 असत रा पड़दा आपै - आप
 ऊगइया सत्य सामनें भांख
 न्याव रं खातर कर फूँफाड़
 निरासावां नै पू ऊं नांख ।१२।

स्वास्थ्य घर सत रो राख्यो ध्यान ---

लीन हुय सांचे पथ स्वाध्याय.
चैतने लोणां नै कर चेत

सरु कर करडो भल अध्याय ११३।
भणाई पतनी नै भरपूर.

उडाया भटक अन्धविश्वास
तोड़ने तमोतोम आकास.

खुलाई कन्यासाला. खास ११४।
जिणां रो लगन लगायो जाप

धरपियो गुरुकुल आसन्न लाग
कागड़ी में कर कुमछां - खम
सीख संस्कृति - सिक्का बेदाग ११५।
सम्पत्ता - संस्कृति रो गुंजार

हिन्द रो हिन्दुस्तानी रीत
भणाई अंगरेजी बेकार
करो भारत विद्या सूं प्रीत ११६।

मा'त्मा बणग्या मुंसीराम
छोड़ने वकालात तत्काल
हवन में अर्पित जोवण होम

धनो - धन जलम भोम रा लाल ११७।
मा'त्मा हा बै सांचे राग

लोभमो' माया परे भगाय
दीप्त हुय दीपसिला रो दोठ
अमर हुयग्या भल आग लगाय ११८।

नजर डोढ़ी रें'तो हररोज
फिरंगी सासन चाल - कु चाल
राख आसन्न सूं करडो रोस
बम्ब रा 'वरकसाँप' गिण ढाल ११९।

‘क्रान्तिकारी आग्रम रा लोग’
कियो इण बात मनां में घात
निखी ‘वैलंटाइन’ आ बात
नहीं पण लागी डोरी हात १२०।

‘क्रान्ती रो है आसम सींव
लिनी आ बान बिरोले घाप
भरम भेटण खातर सरकार
खुदाई कर आंगण न साफ १२१।

कराई दो - दो गज तक जाँव
‘रैमसे’ - ‘मेस्टन’ नजरां बीच
नहीं लागो जद हातां रै‘स्य
लोम रा फंदा फेंक्या नीच १२२।

राष्ट्र रो खूब निखार्यो रूप
छवी रै लागण दियो न दाग
बाप - मां घर सच्चा आचार्य
गिणीज्या सदा सूं वेदाग १२३।

असल में गुरुकुल रै उद्यान
सीचने रगतां - समजळ नूर
लगाई अमरलता लथ - लूब
गूंजन कर सगळा भ्रम दूर १२४।

मास आयो आखर अपरेल
ताल सूं इग्यार तारीख
लियो गुरु मुंसीजी सभ्यास
पाड़ने सतर सन में लोक १२५।

हयो सद्धानन्द - रूप स्वरूप
बृहस्पती मुंसीजी साकार
कर्यो सदा सूं खेळ करार
जंगत में कदै न मानो हार १२६।

हा सैनिक खासा आधलाख
 सगळा मारकिया तईताज
 डाकी बणियोडा सत्ता सूं
 आवै ही वां नै नहीं लाज ।३४।
 जद आजादी रा दीवाना
 आगे बघता ही जाके हा
 उण मक्कारां रो बुध - वापड़
 माया भूवाळी खावै हा ।३५।
 फट भीड़ चोरने फूँफाड्या
 श्री स्वामीजी सामे आया
 गोळी चालण सूं पैलां डट
 नीडर बोल्या सिधणी जाया ।३६।
 जनता पर गोळी मत दागो
 पैलां म्हारो सीनो दागो
 रे दुष्टां ! खडो सामने हूं
 बोड़ो श्री रंगभीनो तागो ।३७।
 तनु छव फुट रो लांबो तगडो
 वपु फोळादी कंचन वरगो
 धो ठोस ठोस हो दीप्त तेज
 सासन - सगती भंजन करगो ।३८।
 सखवाद लास उण लाखीण
 हंस उठ्यो छोड़ मो माया नै
 भक्ष देवण नै बलिवेदी पर
 आ डट्यो कटावण काया नै ।३९।
 हट हक्का-बक्का सैनिक हा
 भुलगी संगीना लाज धार
 हेई मूंडा हा बांड्यां रा
 फूँफाडा भानो आज हार ।४०।

सट स्वामीजी री अग्या सूं
 सान्तो सूं जुलस गयो आगे
 वो सायर गृहिर गभीर वण्यो
 लै'रां रो ज्वार वं'यो सागे ॥४१॥
 दिल्ली री जामा मस्जिद सूं
 भासण स्वामीजी गजब दियो
 संकीर्ण भाव नै ताड़ - ताड़
 ओ खेल अजूबो अजब कियो ॥४२॥
 है भाई हिन्दू - मुसलमान
 ओ आच्छो संलनाद कीनो
 अपरेल माह रै चीथे दिन
 सुभ प्रेम भाव बोयो भीनो ॥४३॥
 सन उगणीसै उगणीस वरस
 वै वण्या दूत मानवता रा
 दट देस भक्ति रै दीवानै
 तागा तोड़्या दानवता रा ॥४४॥
 भण हिन्दू - मुस्लिम एक भाव
 संकीर्ण भाव नै त्याग करो
 रट एक रटण आनादो री
 बस जलम भोम री भाव भरो ॥४५॥
 पच्चीस ' दिसम्बर उगणीसै
 अधिबेसण अद्भुत भारो हो
 अमृतसर मे भेला हुयनै
 वो सासन कड़ो प्रहारी हो ॥४६॥
 घण जलियांवाला री घटना
 मनड़ां में मायूसी छाई
 पण स्वामी जी री गूँज पड़ी
 मुरदां मरदानी हद पाई ॥४७॥

जद प्रकृति परीवसा लैवे है
कुण रोड़ा वण आड़े आवे
पण उद्यमसीलाई रं चायां
हुय सूळ फूल खुसियां छावे ॥४८॥
चौबीस दिसम्बर उगणीसं
वरसा रो जोर हुयो भारी
वै आसावां चकचूर करी
आभै फाटं नं किम कारो ॥४९॥
पण आँधी पांणी - तूफानां
कद डगां भुखावै मतवाळा
पच पद - पर पर टक्कर पाणै
पण कदै न भुखणा सतहाळा ॥५०॥
पलकां पर सगळां मान हुकम
अतिथी सुख सूं घर ठै'राया
बस सफळ हुवैला ओ ऊछव
सहु जोसभाव मन लै'राया ॥५१॥
हा स्वागतकारी स्वामोजी
सरकार डरपगी साँचाणै
खक्करकारक खक्कर टूट्या
टूट्या सहु तागा काँचाणै ॥५२॥
बां भासण दीनो हिन्दी में
कर मंत्रमुग्ध स्तोतागण नै
अंगरेजो रो बेसुरो राग
नी डिगा सक्यो वारै पण नै ॥५३॥
वो सदाचार - नैतिकता रो
हो परवानो पावन मन रो
वो भासण हो इक दिव्य ग्यान
हो मंत्र खरो मानवपन रो ॥५४॥

बां छद्माछन रो तोड़ काण
 उद्धार करण रो बात करो
 दळितां नै आगै लावण रो
 कथ मानवता है जात खरी ॥५५॥
 वंघण तोड़ण नै सासन रा
 बां रो आतम रा भाव वै'या
 कितरां दिन दळितां दुख पायो
 अणगिणती रा अपमान सै'या ॥५६॥
 जद सिरुखां रै सत्याग्र' में
 आपण गूँज्यो भू - अम्बर में
 वै उन्नीस मन बाइस में
 बुध बोल्या दमम दिसम्बर में ॥५७॥
 अर याद 'गुरु गो बाग' करां
 बां नै कारा में पूगाया
 हुय गिरफ्तार स्वामीजी हँस
 भूँड़ो सत्ता नै सूगाया ॥५८॥
 भल सामल हुयगया स्वामीजी
 जद हिन्दू महासभा सार्ग
 दळित' री दसा देख दुख सू'
 बा ना'ओ तोड़्यो उण तार्ग ॥५९॥
 अर अलग रूप सू' दळित' री
 बा सख करी सेवा करणी
 वै जुटगया भट साँचे मन सू'
 वै बीर बण्णा देवा बरणी ॥६०॥
 नवलीग हुयो आन्दोलण जद
 घण मुसलमान बणने लागे
 पूठा सुघ किया आगरै रा
 अर भरतपूर लागे पागा ॥६१॥

बां परिवर्तन करणवाळां
 हिन्दू - हिन्दूपण त्याग कर्यो
 पण स्वामीजी रो कमंठता
 भल आर्यधर्म अनुराग भर्यो ।६२।
 बां पांच लाख नै मुघ वीनो
 अर आर्यभाव में लीन हुया
 कर आर्य धर्म रो सखनाद
 वै कदै न पण गमगीन हुया ।६३।
 वै कदै न डरिया चालां सून
 भुखण रो कदै न चाल चली
 वै भगत खरा हा सखालून
 बस आग - माण ही भोळ भली ।६४।
 पण होणी रूप अरूप घर्यां
 देखावै निय रो रूप गजब
 बा आवै वादै पर निहचै
 अणचीती घर्यां कुरूप अजब ।६५।
 वा काया नै छोड़ कोनी
 कितरा नर - नार उपाव करै
 बा फट्टा फट्ट अर बड़बडाट
 मानव उण पंज हेठ मरै ।६६।
 पण उण जस नै कुण मार सकै
 जिण बलि देदी वल्लिवेदी पर
 जिम मख में आहूती ज्वाळा
 भड़काळ कळुपियो छेदी भर ।६७।
 तेवीस दिसम्बर दिन आयो
 वो काळदूत स्वामीजी रो
 सन उन्नीसी छब्बीस अरे
 हो अमरदान दानाजी रो ।६८।

अब्दुल रसीद मुद्दी - खातर
 धोखे री मन में घात भरो
 आयो कपटी पापी - भूँड़ो
 कालख री लुच्चे बात करो ।६६।
 वे फायर कीना घड़घडाट
 कोमल कालजियै वार किया
 दागी गोळ्यां त्रय दागीलै
 स्वामजी इण जग पार यिया ।७०।
 स्वामीजी जग सूँ राम कियो
 कै राम नाम जग में करग्या
 आँसूडां भरती आँखइल्यां
 पण वै ज्वाळा मख में भरग्या ।७१।
 कस दुस्ट छैकळा तीन किया
 सागर पर तिरतै पोत बीच
 स्वामी बेड़ो आजादो रो
 अब्दुल रसीद हो कोत नीच ।७२।
 वै लेखक हा प्रतिभासाळी
 सेवक नेता हा संन्यासी
 हा आर्य - संस्कृती रा पोपक
 हा मिनख धरम रा विन्यासी ।७३।
 अब्दुल रसीद फाँसी पाई
 वै जुरम कियो मुजरम भारी
 वै धोखे सूँ पन्नग पकड़यो
 वै दानव मानवता भारी ।७४।
 जद स्वामीजी री सीख धार
 मानव मानवता पावैला
 तज भेद-भाव भूँडा टंटा
 संगीत प्रेम रा गावैला ।७५।

केसरी-जोरावर-प्रताप

१२

आजादी रो इतिहास घड़ण
 सै भारतवासो तयार रह्या
 वां अतीत गौरव माण करण
 पूरखां ज्यु तन पर वार सह्या ॥१॥
 हा सिध केसरी वारठजी
 सगळो परवार सुवायो हो
 वै आण राख नीं भूक्या कदै
 जिण कदै न सीस भुकायो हो ॥२॥
 वै क्रान्तिकारणा वीर - वीर
 ज्वाळा रा पुंज जीविता हा
 वै फौळादी वपु ने धार्या
 विसघूंटी ज्वाळ पीवंता हा ॥३॥
 वां चक्कर दीनो मासन नै
 बहुरूप धारणा जोगी हा
 वां घर - प्रिस्ती सूं छोड़ मोह
 नी दो मूंडा बोगी हा ॥४॥
 पण फेंकायोडां अंगरेजा
 चकरीबम अवकल खाई हो
 आजादी रं दीवानां नै
 सीधै - सादे कद पाई ही ? ॥५॥

उन्नीस बरस भूमितन रह
 जोरावर सासन विदकाया
 सन उन्नीस सौ उनतालिस में
 पा सुरग फिरंगी पिदकाया ।६।
 यां यज्ञयल्ली रा होता वण
 जजमान वणयां नियने वारे
 बलिवेदो मार्य भपट - सटक
 मायड़ रा काज सह सार ।७।
 वै सपरी मोत मरण जाण
 नी पीठ दिखावै आराण
 श्रीसर आयां आरियां साण
 रोभै फणघर सींधू गणै ।८।
 वीरां रो फसल अठ होवै
 भूमि आ मरदाभावाली
 है कुण कैवै ऊजाड़ घरा
 आ घरा माण राखणवाली ।९।
 इण ही उपजायो है प्रताप
 गीरो - वादळ चुंडो हमीर
 इण ही माटी में जिल्लम लियो
 जेमळ - पत सम अमर वीर ।१०।
 पदमणी प्रल वण पलभर में
 वण गई भस्म रो ढेर अठे
 कह रह्णो खड़ो चितोड़-थंभ
 कुंभा जंडा भट फेर कठे ? ।११।
 राजस्थानी इतिहास गवा'
 इतिहास मांडणा वीर खड़ा
 । तरवार - कलमड़ी हायां में
 साहित्य - चितारा तीर बड़ा ।१२।

चारण - वारठ चेतानां चर
 बै कसाधात करणा खारा
 जद कायर भागण मता करे
 उण वेळा पै मरणा सारा ॥१३॥
 वै खुद असिघावण प्रलै माच
 बीरां री जोती बणं सदा
 वां रै रैवंतं भाराणं
 गीदडिया सीहा हणं कदा ॥१४॥
 आजादी री थो - रचना में
 राजस्थानो हद नांव कियो
 वारठ - कुळ 'रा' त्रय ऊजागर
 त्रय देव कदै नी दांव दियो ॥१५॥
 हा देव तीन वै दिव्य हदां
 सहु सिंघ बीर अर।मतवाळा
 केसरीसिंघ - जोरावर जी
 सांगे प्रतापजी सतआळा ॥१६॥
 तोनां हो कीनी तकरारां
 तीनूं स्वाहा हुयग्या जग में
 भाई - भाई अर बेटे री
 तीनूं बळि हुय सुयग्या मख में ॥१७॥
 वारठ - परवार अगाऊ हो
 हेंस - हांस मीचु सूं लड़ने में
 नीं पाछ कदै तीनूं हुवणा
 फोंस - फोंस सुळियां चढ़णें में ॥१८॥
 जागीर - हवेळी छोड़ सुखां
 वां क्रांतिकरण मग पग धरिया
 तीनां री सला' अक - सी ही
 नीं सुळी - फोंसो सूं डरिया ॥१९॥

दिल्ली में गया वीरवर दो
 काका भतीज री वर जोड़ी
 जोरावर सिधजी भर प्रताप
 मोर्के पर जाय वम्ब फोड़ी ॥२०॥
 जद वायसराय हारडिंग री
 असवारी निसरी दिल्ली में
 बुरकाघारी काकं बायो
 बम फटाक फूटयो खिल्ली में ॥२१॥
 घायल खट वायसराय दीठ
 चट चररमरर चरमायो हो
 स्काटलैंड थारड सगलो
 फट मररमरर भरमायो हो ॥२२॥
 नी पकड़ मक्का जोरावर नै
 जद सगळां री ग्रन चूर हुयो
 भज अकल भुवाली भैसाण
 वो बूंद सारखी सूर चुयो ॥२३॥
 चट राज फिरंगी चकरायो
 हाजर हथकावका हुयग्या
 घबड़ाया हाकल - बाकल धण
 नाजर छक्का - तक्का सुयग्या ॥२४॥
 सिध जेल केसरी खाट रह्या
 वेटाजी आग सुलगता हा
 जागा - जागा फिर धूमधाम
 नव जोत जळाय मुळकता हा ॥२५॥
 जद आसनाड़ ठेसण माथे
 इक रोज खड़ी हो वर प्रताप
 ठेसण - पति छद्मवेस चीन्यो
 पकड़ाया कीनो पाप घाप ॥२६॥

घोखे नाहर बंधण पड़ग्या
 वो तोड़ण चाहै जंजीरां
 बाईस बरस री छोटी वय
 कुण देता कारां खंजीरां ।२७।
 कितरा दुख दिया कसायां कटु
 कर साम - दण्ड - दम भेद किया
 आस्वासण रै बफकारां में
 उण वज्जर - हिये न छेद बिया ।२८।
 भोसण कस्टां नै सह - सहनै
 मणि-कंचन-काया तत्त्व मिली
 बालक प्रताप री लघु वय में
 सत सत्त्व सत्त्व सून तत्त्व मिली ।२९।
 हा ! पितरी-हिय टुक-टुक हुयो
 पण कद न कायरता व्यापी
 धनजल छोड़्यो काराघर में
 उण री हृदां कद कुण नागी ।३०।
 जोरावरजी नै हृद मिलिया
 श्री रासबिहारी जी साथी
 बस चकचम नैणां चाह बसो
 भइ चिणगारायां उजळी छती ।३१।
 बम फेक बच्चा बुरकाधारी
 पत्थर - पत्थर में आग भरी
 वै फौलादी सगतीसाळी
 बां मायड़ - दुध नी दाग करी ।३२।
 जद भारत - भू यमथळी जठें
 कद राजस्थान रह्यो लारें
 जोहर - ज्वाळा री लेंर उठें
 अंगरेज फिरंग्यां नी धारें ।३३।

भरणे-खपणें अण त्याग करण
 मायड-हित में कद पाछु करी ?
 भामासा हुयग्या दानवीर
 हा फळातरू सभ गाछु भरी ।३४।
 जद - जद आजादी रें जग में
 सावळ - दिखणा री चाह करी
 सद जूगलकिसोर बिडालाजी भी
 दे चंक यगकुंड़ पाह भरी ।३५।
 हनुमानप्रसाद जी री मै'मा
 वें धरम भाव रा पाळी हा
 हा क्रान्तिकरण भग पग धरिया
 वें भल भावां प्रतिपाळी हा ।३६।
 वर जमनालाल बजाज बीर
 गांधीजी रा सच्चा संगी
 वें इण आजादी रें जग में
 रहोया हमेस अरु रंगी ।३७।
 करतीं अणन्त सेवा मां री
 कर त्याग नांव अर विणां नांव
 वें नींव बण्या वज्जर बणनं
 आजादी रा हठ बण्या पांव ।३८।
 मायड रें चरणां सीस थाप
 वां फरज उतार्यो खरो - खरो
 हेंसतां - हेंसतां वे बलि हुयग्या
 वां करज उतार्यो सरो - भरो ।३९।
 पण होणो हाय हबीडा दे
 नी आसे - पास बा देख
 वा आयां वळ्यां खबीडा दं
 नी सज्जण - दुरजण बा पेखे ।४०।

कुण उण पूता रो होइ करे
वै राह दिखावण आया हा
बां कदे न धन-अस चाह करी
वै ही सगळां रा चाया हा ॥४१॥



गूँज भारत छोड़ो री छाप

१३

महामनाजी पूत आतमा
सत्य भाव रा साँचा साखी
वाराणसी विश्वविद्यालय
भारत माँ री गरिमा राखी ।१।
आजादी रँ वीर सिपायां
सिक्सा पाई छण में गै'री
महामना श्री मालवीयजी
दिव्य पुरस हा सच्चा लै'री ।२।
जिण री अमर पताका फँ'री
गुण गावणी मै'मा भारी
आजादी रँ दिव्य हवन में
बलि दी सुख - वैभव री सारी ।३।
छोड़ बकालत आछी चलणी
वीर सम री मांग पिछाणी
आजादी रँ खातर हढ़णी
सत्यवचन कर निरमल बाणी ।४।
खूब जूझीया हेमाळो बाण
स्वच्छ भाव री पावन गंगा
सच्चा पावक खूब चमकिया
दल - बल जूझीया जिप्पण जंगा ।५।

राजाजी अर वीर विनोदा
 जे प्रकासजी आगे आया
 लालबहादुर पटेल वीरां
 आजादी साके रंग लाया ।६।
 जद पूर्ण स्वराज्य रो मांग करी
 लाहौर हुयो प्रस्ताव पास
 सन उन्निस रे छैकड़ले दिन
 हो नेरुजी रो भाव खास ।७।
 छव्वीस जनवरी तिस सन रो
 आजादी रो दिन थाप दियो
 सगळे भारत खुल खुसो करी
 आसा - विस्वासो छाप दियो ।८।
 तद नमक नेम नै तोड़ण नै
 दही जात्रा भट आप करी
 छव अपरेल तीस सन में ही
 घरणा बंदी हद धाम करी ।९।
 सह - विनै अवग्या आन्दोलन
 जद जोर पकडतो जाव हो
 अर बीच विलायत सम्मेलन
 वो गोळमेज कै लावे हो ।१०।
 इरिवन - समझोतो हुय प्रसिद्ध
 सप्रू - जैकर रे कैणां सूं
 अर छूट्या नेता दाढ़ाळा
 पण बात वणी ना वेणां सूं ।११।
 हा भीमराव जी भीम जडे
 किम भूल सकां इण रचना में
 जगजीवन राम हरख मन सूं
 जिण किया - काम संरचना में ।१२।

पंचाट मेकडोनल्ड हुयो
 जद काँगरेम में फूट भरी
 बल्लभ भाई अर राजाजी
 राजेन्द्रप्रसादजी कूट करी ११३।
 पण ने'रूजी संग नेताजी
 इण रं विरोध में राय करी
 ये वाम पंथ रा हा साथी
 ना उर्णा मनां आ दाय भरी ११४।
 जद क्रिप्स - योजना बीयाळिस
 नेतावां रं सामी आयी
 मट पाकिस्तानी मांग मानणो
 पिछवाड़े सूं आणे पाई ११५।
 नेतावां न दाय न आई
 जण मांग कोती ठुकराई
 जदे सफल ना हुया क्रिप्स जी
 विफल हुया वां करी विदाई ११६।
 जद बीयाळिस सन जोस भग्यो
 'भारत छोड़ो' री गूँज उठी
 अँगरेजां रा हिवड़ा कांप्यां
 सगळां काळजियां धूज भरी ११७।
 भट दूर हटो दुनियावाळां
 म्हांर इण सपरें भारत सूं
 किण ही सूरत इव नी सेवा
 म्हे पिड़ छुडासां गारत सूं ११८।
 म्हे करां - मरां ओ भाव धार
 इव रुद्र रूप दिखळावालां
 नी फाकी में थारी आवां
 हक सीने रें बळ पावांला ११९।

आ सुणी घोसणा हाक भरी
 अंगरेजां कुट चाली चाली
 अणवंध करो भट कांगरेस
 पकड़ा पकड़ी कीवी काली ॥२०॥
 पण राममनोहर री चालां
 अंगरेजां नै तग करणो ही
 कुपलाणी पारं जिम नर हा
 रीतै घटकां नै भरणी ही ॥२१॥
 कस्तूर मुबासित कस्तूरो
 सन चम्माळिस में घाम गया
 गांधीजी हद बीमार हुया
 जद जेळ घाम सूं मुगत किया ॥२२॥
 मन पैताळिस में वेंवल सूं
 उण प्रस्तावां मत भेद थियो
 पण मुगत हुया नेता सगळा
 सिमला - समझोतो खेद वियो ॥२३॥
 श्री रासबिहारो हा बांका
 तज घर-ग्रिस्ती रो-मोह जाळ
 छोड़ी चलणो बाकालत नै
 अंगरेजां खातर कळू - काळ ॥२४॥
 आजाद फौज रै दोवानां
 आजाद हियै रा मतवाळा
 कानून - रूप वध कानूनां
 बां पार किया हद - खळबाळा ॥२५॥



रटण रट खून करो बगसीस

१४

जद पूतां और सपूतां रं
 मन रं भावां घमरोळ मची
 भारत - भू नं आजाद करण
 टढ़ निस्चं री मच लगन सवी ।१।

जद हिंसा और अहिंसा रं
 पथ बोच भर्यो-तरणी पाणी
 हद तूफानां रो बातचक्र
 घिरतो दीठो दुःखां - साणी ।२।

चण तमोतम रं भारगियं
 सह हाथ - पांव फूनण लागा
 रोलट जिसडे कानूनां री
 भण याद चैन चौकड़ भागा ।३।

सहु जळियांवाळो काण्ड सिंवर
 रग - रग में रगत रक्त राख्यो
 भाखड़्यां हुयगी लालचट्ट
 मन घुमड़-घुमड़ खलबल माच्यो - ।४।

पूरब - पच्छिम रो पथ राही
 उगतां कालोतम छेद - करे
 निय करां पसार्यां कुन्त-नखां
 दिन में दिनयर दिव भेद भरे ।५।

ज्यूं - ज्यूं आगै रथ वहन करै
 सूरज रो तेज हदां भारी
 ब्रिख रो तरणी तमतमाटणो
 कुहरै रै वेरी बलिहारी ।६।
 किम सूरज रै ऊगन्त टिकै
 कुहरै रा बादल दुखणिया
 वै श्रेक झगटै असम होय
 थर थर कांपै जग सूकणिया ।७।
 तरणी रो तेज गंण दोसै
 चमचमाट करतो सुखकारी
 सगळी आसावां पूर सरै
 हरखावै सगळां नर - नारी ।८।
 जिम श्रेकळ द'दां चूर करै
 सेळां रो घण घमरोळ सह्यां
 नी पीठ दिखानो अरि आगै
 मस्ती मस्तानी डोल कर्यो ।९।
 जद सकट हिचका खाय-खाय
 इणगी - बिणगी डगमगी गुड़ै
 तडै - खडै भट धवळ तणी
 पर्ण कदै न उळटी राह मुड़ै ।१०।
 नाहर नै कद कुण जोत सकै
 कुण उण रै मूंडै रास धरै
 इसड़ो कुण जायो पून जमी
 अंगारां सूं किम हास भरै ।११।
 जद आसावां हुय चूर - चूर
 हिय बीच निरासावां जामी
 पट्टाभीजी नै कर 'परोस्ज'
 नेताजो बागडोर थामी ।१२।

वो खून उबळते रो सीरु
 रक्तिम काया कंचन वरगो
 इतरो साहस इतरी सगती
 मायङ्ग - भगती रग - रग भरगी ॥१३॥
 उण नांव ख्यात हुय खूब फळ्यो
 नेत्राजो नेता सुखकारी
 वो अतुळ वळां रो भव्यरूप
 वार्यां उण पर सह नर - नारी ॥१४॥
 हो वज्जर - गात मोम हिरदो
 दुख देख न सकियो मायङ्ग रो
 आंसू भेटण न लोही दे
 धन फरज निभायो जायङ्ग रो ॥१५॥
 उण कह्यो न करसूं नोकरडो
 सह सुणलो राज फिरंगी रो
 नीं धार गुलामी डू पग बेया
 नी चालू चाल दुरंगी रो ॥१६॥
 नीं जीणें में भद्रक नर - नू
 मायङ्ग रै थण नू चूटण में
 धिक कायर पूत कपूतां धिक
 धिक परवस ऊमर खूटण में ॥१७॥
 वें कदै न पद रो चाह करी
 वो जन - जन रो हो हितकारी
 वातां में अकज न समै खोय
 वां काम कियो ऊजळ भारी ॥१८॥
 वां चेत चेतना खूब भरी
 हुंकार करतां हाक योच
 थे खून करो बगसीस मनै
 आजादी हखां सींच - सींच ॥१९॥

हूं स्वतन्त्रता री जोत दीप
 सींचूँला ऊजळ रगत - तेल
 इण सिर जाणी रं सोदे में
 ओ खूब अजूबो अमर खेल ॥२०॥
 इक कतरो लाय लगावे इन्न
 चिणगारी रुखां बाळ - बाळ
 बस खून - खून री अक रटण
 हूं काट फिरंगी कुटिल घाल ॥२१॥
 जद सिघापुर री सभा बीच
 सिघ गरज करी हुंकार कड़ी
 इतिहास लिखण आजादी री
 दो - खून - खून इण कड़ी घडी ॥२२॥
 ओ कागद आगं करूं आज
 कुण कग्ज उतारं माता री
 निय तन री पूत रगत इण पर
 जग निरणे करसी दातारो ॥२३॥
 आजादी री इतिहास नही
 काळी स्याही लिख पावला
 इण कारण सहू सुणलो भावां
 रत नदी बहाई जावला ॥२४॥
 हर समे कफण माथे बाध्यां
 कुण सामो आवं पग मांडे
 सिर लेना - देणो सोदे सूं
 कुण टक्कर लेवं कर खांडे ॥२५॥
 थां में है जोस खूब भरियो
 हें जाणूं थांरे भावां नें
 थे सगळा जोगी बण्या खडा
 बाळ्यां सगळी इच्छावां नें ॥२६॥

रट एक भाव है सगळां रै

मन में सगळां तूफान भर्यो
रवी प्रनै माचणा हो सगळा

जम नी ठंरै हुंकार डर्यो ॥२७॥

ये तोड़ सखी चट्टानां नै

तूफानां री गति रोक करो

थे पिमुणां नै भट खूँद - खूँद

मायड रै झोळं खुसी भरो ॥२८॥

अं रगत मइया आखर हुयसी

सोन हीरां सूँ अघक मोल

कृण होइ करैला भागत री

बोलो, बोलो सहु खरो बोल ॥२९॥

यावू मुभाप आ बात कह्यां

कागदयुन हाथ बधाया हो

यस देर उठै ही किण विध री

सगळां मन जोस सवायो हो ॥३०॥

म्हे देसां - देसां खून खून

लालीयुत दीपां आब करां

ओ व्यथ पुटंग न जावैला

सिन्दूर मात री मांग भरां ॥३१॥

कागद पर कागद लाल हुया

पण भीड़ ऊमड़ी नदो जेम

आगै ही आगै बढ़ती वा

सुभ भली सुलपणी हुई टेम ॥३२॥

सहु वोल्या सांचो नेम करां

आजाद मात नै करणै रो

नी झुखा - फिरां सामे जम रै

म्हे नेम करां रण मरण रो ॥३३॥

की है मजाल गादड़ियां रो
 नाहर री मूँछ मरोड़ करे
 कुण सामी दिस्टी करे दुस्ट
 भड़ भाड़ें रूँख करोड़ भरे ।३४।
 थां रै जीवन्ते नेताजी !
 हुयसी आजाद भोम म्हारी
 कितरा छळ - कपट करे कूड़ा
 वारं था पर जग बलिहारी ।३५।
 थे लाल मुलपणा हो याती
 म्हारी आँखड़ळ्यां रा तारा
 था पर म्हे सगळा न्योच्छावर
 थे प्राणां सूँ प्यारा म्हारा ।३६।
 थां रो पड़सी पद अक जठें
 म्हारा सहस सिर जावैला
 थां रो वस अक इसारो हो
 सच नई रोसनी लावैला ।३७।
 थे भारत - भू रा वाकड़ळा
 वांकड़ळा वीर सवाया हो
 थां ऊपर मायड़ बलिहारी
 सत सूरज सीस नवाया हो ।३८।
 जस हिन्द केसरी केसर जिम
 थां री मै'मा उत्सा'कारो
 थां प्रलयकर हुंकार किया
 वन्दण सिस्टी करदे सारी ।३९।
 तन तप्त सूर्य नै मात करण
 है दिव्य नूर चमकणवाळो
 इण साखी वरदी भव्य छिप्यो
 वै'वै जिण इंगित रत - नाळो ।४०।

यां रो इक नांव सुमरतां हो
 मुरदा में जिन्दगाणी छावे
 यां रो सख वीर सुसपणो तन
 सगळी कायरता मर जावे १४१।
 यां इसड़ी जोत जळाई थिर
 या ऊज्जरहा घड़ी चोखी
 यां दोष - सिखा इसड़ी थरपी
 भाग सगळी काळख दोखी १४२।
 आजाद फौज रें पद प्रताप
 पद भिन्हां छाप इसी गांणो
 जय हिन्द - हिन्द जय रो नारो
 मुरदा मे मनु जीवण ठाणी १४३।
 आजाद फौज रो दीवानो
 आजाद फौज री शुभ वांणो
 आजाद हुवड़ री जोत जळा
 नूतन प्रकास लाली तांणी १४४।
 जद सभा विसर्जित हुई भला
 नेताजी - काया दमक उठी
 जय हो जय हो नेताजी री
 सासन री उण मूं चमक छुटी १४५।

प्रकासी स्वतन्त्रता री जोत

हूजं जुध में अंगरेजां री
सत्ता डिंगली ही जावं ही
जद फौजां हार फिरंगी री
घण ठोड़ा मुंह री खावं ही ।१।
आजाद फौज हद हावी हुय
बीजी फौजां पर छावं ही
नेताजी री न्यारी कमान
थागे बढ़ती ही जावं ही ।२।
भंड हीमन जोस घणो भरियो
अंगरेजां बुध चकरावं ही
बांका बीरा लंकाळा सूं
सुहणां में ही डर छावं ।३।
आजाद फौज आगे बढ़ती
आसाम सीव लगलागं ही
कितरी सी सीव बाद रहगी
आजाद नीव तक ताकें ही ।४।
चम्पाळिप्र में ही भारत रो
सौभाग्य सामनं आवे हो
पण जापानी दुग्भाग सांतरो
दुखकारी दुख छावं ही ।५।

जद दोय मोरचां मांथे वा
इम्फाल - कोइमां रै थाणां
जापानी हार मान सुयग्या
डाको श्रीटस हुयग्या खाणां ॥६॥
जापान समरपण जद करियो
परवस आजाद फौज हुयगो
हा ! आसावां चकचूर हुई
अरमान दसा कसमस सुयगो ॥७॥
जद लालकिन में ढोंग कियो
अभियोग चलायो वीरां पर
खोटा - झूठा नीं दफा डरे
भड़ भिड़ै चालणां खीरां पर ॥८॥
सन पैताळीस नवम्बर में
जद हुई कारवाही जारी
सेनाणी सही बात अड़िया
झूठी सत्ता पड़गी सारी ॥९॥
कद डर्या मोत सूं मतवाळा
कट भीचु सदा ललकार करै
हँसता - हँसता जा आराणं
यण रुद्र रूप किलकार भरै ॥१०॥
बां जुगम कियो हो नी कोई
वस स्वतन्त्रता री चाह करी
जुलमां - सासण सूं टक्कर ले
नी निय कस्टां सूं आह भरी ॥११॥
आखर में गिरफ्तार कीना
मायावी - सत्ता - भक्कारा
फण पण फणधारा फूँकार्या
वीणा रै मत्ता वक्कारां ॥१२॥

आजाद फौज रँ वीरों पर
 झूठा अभियोग लगाया हा
 फाँसी देवण री चालां फण
 सहु निममां परा भगावा हा ।१३।
 ढिल्लन-सहगल अर सा'निवाज
 मुळजिम वण सामे आया हा
 भूला भाई नियमां - नाहर
 कानूनी चक्कर लाया हा ।१४।
 किम नून साब'री चलतो जिद
 झूठां रँ पाँव नहीं होवें
 झूठां सावसी भी ठै'र सक्का
 जाणं खोटा मिणिया पोवं ।१५।
 सरकार उलझतो जावें ही
 सरकारी पक्क रगड़ खाई
 सिध पकड़्यो भीदड़ री गत-सी
 निय भूँड़े लक्षण जकड़ पाई ।१६।
 आखर वं मृगत हुया तोनूँ
 तीनूँ अळवेळा देव तोन
 भारत रो सपरो दिव्य भाग
 बां सतपथ राखी देव कीन ।१७।
 धिन - धिन भूलाभाई जी धिन
 थे कानूना रा नाहर हा
 थां कानूनी जबड़ां विच मूँ
 तोना नै काह्या बाहर था ।१८।
 जद हुयो चुणाव विलायत में
 मजदूर पारटो जीत गई
 सरकार अटली भार सांभ
 चालण चाही निय नीत नयी ।१९।

भारत की ख्याति करण खातर

इक केबिनेट मिसन आई

पावांला इव आजादी मूट

सुण आसा की किरणां छाई १२०।

सतदोय पांच रै वरखिलाफ

जद लोग अल्पमत में थाई

पण लोग अड़ाई टांग परो

कुल सेवत्तर सीटां पाई १२१।

अर दंगा भड़क्या भड़भड़ाट

सहु सम्प्रदाय - विस जोर धियो

घड़घड़ाट मारकाट माचो

माउंटबेटन पंचाट कियो १२२।

जद ब्रिटिस संसद एक्ट कियो

हा ! टुकड़ा भारत रा हुयग्या

मायड़ रा लाड़कुंवर भिड़-भिड़

सगळा नाता - रिस्ता सुयग्या १२३।

अंगरेजां की खल भूँड नीत

माता रा खंड टूक करिषा

आ विगत विदारै हिवड़ै नै

टावर - नर - नार कूक मरिया १२४।

ने'रुजी नै भल संभळाई

सासन की बागडोर सारी

जिण कियो समरपण सुख जीवन

हा पंडितजी हीमतकारी १२५।

भाई - भाई बंटवारो कर

चाभ्रे दीवार खड़ी करलै

पण भाव मनां रा निरमळ हुय

हिय प्रेम - भाव पाछा भरलै १२६।

पनरें अगस्त सैतालित नै
 सोनें रो सूरज उदित हुयो
 लाली लख प्राची लाल - लाल
 जन-जन रो मन अत मुदित हुयो ।२७।
 रूप सुलखणो राष्ट्र - तिरंगो
 जद मुगत गैण में कं'रायो
 आजादी रो सुभ बेळा में
 सरसित हुय सहु मन लै'रायो ।२८।
 आजाद हिन्द रो जं जं जं
 जै इण पर मरणवाळां रो
 जय राष्ट्र - तिरंगें रो जं जं
 जै बलि निय करणंआळां रो ।२९।
 जै स्वतन्त्रता रो जोतां रो
 जिण परकासो जोतो गे'री
 मन अंक भाव बलिमाग मच्या
 जिण कस्टा रो माळा पं'रो ।३०।
 भारत माता मुख वैण भर्या
 हूँ अखण्ड हूँ अखण्ड रै'ऊं
 भारत मन हुय मत डरपीजो
 हूँ प्रचण्ड हूँ, न खड सै'बू' ।३१।
 म्हारै खातर थे खूब लइया
 हूँ चहू थारी खुशियाली
 फल फून बगीचां खूब फळे
 खेतां सरसावै हरियाळो ।३२।
 सगळा हिलमिल आनंद पावें
 सगळा मुख-दुख में अंक भाव
 बस रिच्छकरण आजादी नं
 सगळा रो हुयसी सद् सभाव ।३३।

उत्तर-दक्षिण - पूरब - पश्चिम

है सगळां रो इकसार रूप
था रो मायड़ विस्तृता घरा
समझो थे म्हारो ही सरूप ।३४।
हूँ गदगद हूँ किम वैन कहूँ
थां करज उतार्या मायड़ रा
जुग - जुग जीवो आसीसां हूँ
थे लाडकुंवर हो जायड़ रा ।३५।



ओ काव्य रूप मणि भावां रो
आजादी रो परवानो है
सहु वोर सुलप्रणा री गाथा
सपरो उजळो वरपानो है

वतन रै वास्तै

वतन रै वास्तै जीणो
 वतन रै वास्तै मरणो
 वतन री जिन्दगाणी वर
 वतन रो माण घण करणो ।१।
 इणी में जिळमियां वीरां
 वधायो माण माता रो
 कर्या हेंस सीस रो सोदो
 घन्य है नांव दाता रो ।२।
 हरखियो मात मन हुळस्यो
 तिरंगो गगन बिच फेर्यो
 खुसी सूं भूम 'जन - मन - गण
 गार्वता सदा मन लैर्यो ।३।

□□□

मानवां रो मानवां सूं
 प्रमथुन मिळणो हुवै
 आदमी हैवानियत सूं
 एकदम न्यारो हुवै ।
 आदमी इन्मानियत रो
 रूप सर्वोत्तम वणै
 आदमी इन्मानियत सूं
 रूप पुरुषोत्तम वणै
 रूप पुरुषोत्तम वणै ॥

□□

